



## TAPAK 10

Ireland Ato Kelonser asütsü India-origin, Leo Varadkar shim



## TAPAK 12

Thailand Open Grand Prix B. Sai Praneeth-i kokogo

VOL. XIV NO. 227 (ADOK 227)

DIMAPUR

MONDAY

JUNE 05, 2017

5.00

### Angh-i World Environment Day salem metetdaksür

**Dimapur, June 4 (TYO):** Nagaland Angh, PB Acharya-i World Environment Day tepela salem lemsatepba den külemi iba anogomung nung asenoki alima wazüka aser kümzüka ayutsü tenangzükba agishitsü imlar ta metetdaksü.

World Environment Day ya lipoküm aser alima kümzüka ayutsü atema osang sangoktsüba anogo ka lir. Iba anogo nungsa lipoküm kümzüka ayutsü atema sentongtem atonger, ta Angh-i sangdong ka nung metetdaksü.

World Environment Day ya mezüng 1974 küm nungi amungtsü tenzik aser tang India dena linük 143 nung ayongzüka amunger. Taküm iba anogomung atema omenji 'Connecting People to Nature' lir, ta paisa ashi.

Iba tobur tajung Nagaland state nung alemli nungi nisungtemi lipoküm den kanga dang putepa liyonga aru. Ajisüaka, tia maka industrialization, urbanisation aser nisungtemi teka aiba ajanga asen lipoküm mejungi kümogo. Küm ishika tejakdang nungi Nagaland aser nübortemi lipoküm wazüka ayutsü aser kümzüksü atema tebilemtsü bena mapa inyakba angudang kanga pelar, ta Acharya-isa ashi.

Paisa, sorkar department aser teloktem, shisaliok rejutem, alima meimertem, shishilembartem, mulungtet teloktem lipoküm wazüka ayutsü aser iba jagi tarutsü pututem atema jenjang tajungba kümdaksütsü atema mepishia metetdaksü.

### Assam nung tzümetsüng aser anentsüh ajanga timtemer

**Guwahati, June 4 (Agencies):** Assam nung tzümetsüng ajanga nisung 13,000 shi timtemer aser anentsüh aluba ajanga Barak Valley tsütsülen train mesenzüteter, ta Deobarnü ketdangsertemi metetdaksü.

Assam State Disaster Management Authority ketdangsertemi ashiba agi, tesüiba ghonda 14 tsüngda Lakhimpur, Jorhat aser Biswanath district tem nung tzümetsüng ajanga yimtsüng 28 kongshia lir aser nisung 13,000 shi timtemer.

Tenemtem aliba Dima Hasao district nung anentsü timtem

ajanga Barak Valley-i aoba train lenmang shibangogo. Honibarnü Northeast Frontier Railway (NFR)-i Lumding nung Silchar-i aoba passenger train ka athitsüsa aküm, ta ketdangsertemisa shisem.

Brahmaputra ayong nung tzi kanga yimtendar aser Nimatighat nungbo 'danger level' ajanga tuogo. Iba jagi Jorhat nungi Majuli-i aoba rongtem mesenzüdaksür, ta ASDMA-isa metetdaksü.

Assam sorkari tzümetsüng timtem ajuruba district tem nung ketdangsertem dang relief & rescue osettsüset anepalutsü atema tetuyuba agütsüogo.

### Nashi metepsettsü nokdangba indang tebilembatem agizüktsü: Harsh Vardhan

**New Delhi, June 4 (Agencies):** Sorkari nashi metepsettsü atema tetuyuba ka agütsüba sülen linük nung ashishitep ken o tuluka adoka tejembidak nung, Environment Minister Harsh Vardhan-i Deobarnü par ministry-i iba dak sendakba nung tebilembatem agizüktsü mulunga lir ta ashi.

Iba tetuyuba agütsüba ya

nisung kar achiajemba anema mesüra shi alepba maparen nung timtem agütsütsü mesüra telok shinga anema masü, ta Vardhan-isa ashi.

"Tebilembatem lemsatepogo aser ibaji onoki meyipa repringshitsü. Iba onük ya sorkari tenüng tajung agütsü atema inyakba masü" ta paisa shisem.

(Maneni tapak 11 nung...)

### District 5 nungi power supply timtemtsü

**Dimapur, June 4 (TYO):** June 1, 2017 nungi Mokochung nung 220/132KV PowerGrid Sub-station anepalutsü atema shibangba ajanga Aolichen nung aliba Mokochung Load Centre nung power peria magütsüteter, ta Sub-Transmission Division, Assistant Engineer, Thungbemo Lotha-i sangdong ka nung metetdaksü.

Iba khuret ajanga district pungu- Mokochung, Tuensang, Mon, Zunheboto aser Longleng nung 'load shedding hours' talila asütsüsa akümer. PowerGrid sub-station ji June 12, 2017 tashi shibangtsü akok, anungji normal power supply magütsü tashi nübortemi timtem arema atatsü mepishir, ta Assistant Engineer-isa sangdong nung ashi.

### Kiralongrartemi London nung nisung 7 tepset; Police-i 12 apu PM Theresa May-i 'Islamist extremism' aitsür



Honibar aonung England yimtiba London nung kiralongrartemi nisung 7 tepsetba sülen Deobarnü police-i Borough Market nüka mitba noksa nung angur. (London, June 4)

**London, June 4 (Agencies):** Honibar aonung London Bridge aser temeket nung nisung 7 tepsetba aser 48 yirutsüba lendong atalokba sülen British Police-i tanü iba dak sendakba nung nisung 12 puogo ta metetdaksü.

"Met nungi Counter Terrorism Command ketdangsertem tanep Barking, London nung nisung 12 puogo. Parnok ya yasüng London Bridge aser Borough Market tesem nung atalokba lendongtem atema apu. Onoki Barking nung maneni ki kar mita repringdar" ta London nung Metropolitan Police-i metetdaksü.

Honibar aonung London Bridge nung van gari temesüng kati nisungtem dak atsük, iba sülen gari nungi nisung asem

kimai alu aser anameta aliba Borough Market nung nisungtem dak kotari agi atsüng.

Tesüiba ita asem tsüngda United Kingdom nung kiralongraba mapa ya tang agi tasembenbuba ataloker. Taküm March ita Westminster nung nisung 5 tepset aser hopta ana tejakdang Manchester nung bomb agi nisung 22 pokset.

Deobarnü British Prime Minister, Theresa May-i, "London nung kiralongrartemi amakyonga, June 8 General Election ji sentong yanglua aliba ama memelenshii dang agütsü" ta metetdaksü.

Linük nung kiralongrartemi asemben tashi amakba ya tali bilemloka oa amangba Islamist indang tangatetba tamajung ajanga lir, ta May-i aitsü.

Tanü rongdak COBRA senden ka amenba sülen Downing Street kima nung Prime Minister-i "ozüng alema inyaksangshiba ajanga democratic maparen nung tetsükdaksü maludaksütsü" ta osangbenertem dang ashi.

"Joko ojang ta ashitsü mapang tongja tongogo. London Bridge aser Borough Market nung tai maket nisungtem tepsetba khukhua aitsür" ta laisa shisem.

Britain nung tawa kiralongra mapa inyakba ya Islamist extremism indang tangatetba tamajung ajanga lir. Iba tangatetba ya Islam mashileni angateta amangba ajanga lir aser ochi meyipsaba lir, ta British Prime minister-isa ashi.

(Maneni tapak 11 nung...)

### Kerosene subsidy & Atal Pension Yojana atema Aadhaar kuli agütsü

**New Delhi, June 4 (Agencies):** Atal Pension Yojana indang tajangzüktem angutsü aser kerosene alitsü atema sorkar nungi subsidy agütsü atema Aadhaar card nungdaksü.

Atal Pension Yojana kübok kerosene subsidy agirtem mesüra pension scheme nungi tajangzük angurtemi, tang nungi Aadhaar number kuli agütsütsüla mesüra Aadhaar atema zülüoktsüla, ta Deobarnü ketdangsertemi metetdaksü.

Kerosene subsidy atema Aadhaar agizüktsü mesüra enrolment asütsü atema tatembang anogoji September 30 asütsü.

Atal Pension Yojana atema Aadhaar agizüktsü tatembang anogoji June 15 asütsü, ta ketdangsertemisa shisem.

Aadhaar card magizük tashi ration card, driving licence, voter identity card, Kisan passbook

with photo, Mahatma Gandhi National Rural Employment Guarantee Scheme (MGNREGS) kübok agütsüba job card, gazetted officer mesüra tehsildar kati agütsüba kulikaketji maitsü indang kuli ama amshitsü.

Maneni, iba scheme kübok agütsüba ration card den mesüra bank account den Aadhaar number sendakteptsü atema telemtetba agiogo.

Ministry of Oil and Natural Gas-i Direct Benefit Transfer ka ajanga subsidy agütsür aser ibaji scheme kübok züngsema alir bank account nung indangindanga enoktsür.

Scheme ana nung Aadhaar kuli agütsü lemtetbaji, subsidy tangar keti maotsü aser tangutsü shitak angutsü atema lir. Iba atema Centre sorkari Aadhaar Act, 2016 nung Arlla 7 benokogo.

Iba Arlla nung, sorkari

subsidy, benefit mesüra service agütsüba Consolidated Fund of India (CFI) nungi agütsür aser nisung ka jangjatsü atema mapa inyaksü akok mesüra Aadhaar indang kuli meshitsü akok, ta lateta lir.

Centre-i state aser Union Territory tem jenjang dalang agi cooking fuel agütsüba ama subsidised kerosene agütsür. Talisa iba teyari ya BPL kübok alir nem agütsür.

Atal Pension Yojana ya arishi küm 18 nungi 40 tashi nem agütsür. Iba scheme kübok züngsema alirtem arishi küm 60 ajungba sülen, peii enokba nung ajemdaker ita nung sen 1,000 nung 5,000 tashi pension agütsütsü.

Tia makai scheme nung züngsema alirji süra, kasa pension ji kinungtsü mesüra kinungbo nem agütsütsü aser ibaji asü nungbo, nominee nem anünga aliba pension ajakji agütsütsü.



Indisen (Dimapur), June 04, 2016: Indisen Baptist Arogo nung Father School sentong May 30 nungi June 2, 2017 tashi liasü aser iba sentong nung tebutem 73 aden. Father School tesayurtem DABA nungi Rev. Watitoshi Kichu, Rev. Maong Lemtur, Dr. Moa Imsong aser teyariteper Mr. Temjen Imsong & Mr. Lanuyanger arua sentong ajak takok aser temoatsü nung agiogo. Iba temoatsü aser takok asoshi Indisen Baptist Arogo-i DABA dang pelar aser Tsüngrem tenüing asanger, ta Indisen Pastor, Rev. Dr. Temjen Ozukum-i sangdong ka nung metetdaksü.

## Cooperation dept. ketdangsertemi Tuli nung Tea Factory semdang



June 3, 2017 nü Echahaba Tea Factory, Merangkong, Tuli nung Lithrongla Chishi-i ETGCS züngsemtem den jembiba noksa nung angur. Kasa noksa nungsa RCS, Wepe Ritse, ETGCS Chairman, Dr Aotoshi aser DRCS, Temjenmongba nungera angur.

**Tuli (Mokokchung), June 04 (TYO):** June 03, 2017 nü Cooperation Department Secretary, Lithrongla G Chishi leniba nung Registrar of Cooperative Societies, Wepe Ritse aser department nungi ketdangsertemi Merangkong, Tuli nung Echahaba Tea Factory semdanga liasü.

State nung Cooperative

indang Tea Factory ji iba kija ya lir, aser iba ya Echahaba Tea Growers' Copereative Society Limited, Merangkong-i ajungkettsür.

Iba sentong nung Cooperative Society züngsemtem aser Merangkong Village Council züngsemtem den jembidang Lithrongla-i, iba factory junga ketdangsüa high

quality standards adokdaksüba aser tajangzük ngudaksüba atema society nem tenüingsang agüja liasü.

Laisa yimertem dang süngolu tulu ayimtsüla, kechiyong ibaji ajanga sen aazükba dang masü saka rongsenkettsüing mapa-a yakyaka kümdaksür, ta ayongzük.

Echahaba Tea Factory ya 2013 küm tenteta liasü, aser iba factory tenzükdangbo küm shia 300 MT tea indang capacity dang amenoka liasü saka 2016-2017 küm 900 MT capicity amenokogo.

Iba factory nungi adokdaksüba shilem tila ka dang retail ajanga ayoker, saka shilem timbaka Guwahati Tea Auction Centre ajanga ayoker. Iba ya brand tenüing 'Merangkong' kübok Tea Board of India-i achaayanga ketdangser.

## Centre tetuyuba agi Arunachal bo malener: Tapir Gao

**Guwahati/Tura, June 04 (Agencies):** Arunachal Pradesh BJP Tir, Tapir Gao-i, Supreme Court tetuyuba nung ajemdaker Centre-i nashi densema kiset shirurutem tepsettsü atema ayokba nokdangba ozüing agi state bo malentsü, kechiyong iba state sobaliba nung tamangba yimsü dak sendakba nung shirurutem taküm tenlar, ta ashi.

Osangbener den jembidang BJP leniri, "Onoki tamangba

yimsü dak sendakba sentongtem nung ang achir. Tamangba yimsü dak sendakba nung shiruru tenlaba ya akhidang nungi onoki sobaliba senmanga aruba inyakyim ka lir. Arunachal Pradesh nungbo shiruru tepsetba indang commercial slaughter unit mali. Onoki sobaliba bentshia shiruru tepsetba atema Supreme Court nungi tetuyuba agüja mali," ta ashi.

Iba state nung sü (mithun) ya tamangba yimsü dak

sendakba sentongtem nung tenla agütsür. Sü shi ya kidanger state, Nagaland nunga achir, ajisüaka Meghalaya aser Mizoram na nungbo nashi shi ang sapua achir.

Iba onük nung Congress-i BJP aitsüba dak sendakba nung BJP lenir Tapir-isa, "Centre-i Supreme Court tetuyuba angar dang lir. Centre nung Congress sorkar ali asübo parnokia Supreme Court tetuyubaji angala," ta ashi.



Artang Baptist Arogo Youth Ministry-i ayongzükba "Environmental Sunday" sentong nung tongti o jembir District Ambassador Swachh Bharat Mission aser Mokokchung Press Club Tir, Wb. Limalenden Longkumer den ABAYM tenzükertem, Artang ward Sanitation Committee züngsemtem aser tangartem noksa nung angur. Tongti o jembiri "connecting people to nature" onük nung ajemdaker tagitsü o aser inyaktetsüba maparen aika tuyua tesentepertem ayongzuka liasü. Sentong nung adener ajak nem Artang ward sanitation committee-i tatemtsü süngdong kaka lema agütsü. Mokokchung, June 4, 2017.

## GPRN/KTU-i Khailun Haokip asüba atema mangyimer

**Dimapur, June 04 (TYO):** Kuki Tribal Union nungi GPRN Steering Committee züngsem, asür Khailun Haokip June 1, 2017 nü tepsetba atema GPRN-i mangyimer; pa ya May 27, 2017 nü Manipur, Ukhrul district, Kajong Block kübok Natjang yim nungi puer ao, aser June 1, 2017 nü KNF (N) James teloki tepset, ta GPRN Steering Committee züngsem aser Kuki Tribal Union Tir, L H Paohao-i sangdong ka nung metetdaksü.

"Asür Khailun Haokip ya mapang ka nungbo KNA (Kuki National Army) nung liasü. KTU den senden amendang, India-Naga yimtenren onük tashi aittsü atema parnokio NSCN/KTU den lokteptsü lemtet. Iba dak sendakba nung pai NSCN nung aden," ta Paohao-isa ashi lir.

2015 küm August 3 nü tezüngzüktep agiba Framework Agreement

pusema nungiter lenirtem rongnung pa dena liasü. Pa temang mejungaka, pai linük atema inyaka pa tajungtiba agütsüogo, ta paisa shisem.

"Tanü onok Kuki Tribal Union, aser Naga linük atema tashitait lenir ka makai kümogo, shibai Naga linük atema pa tajungtiba agi tenzuka aru. Tanü pa asenok den meliaka pai Kuki aser Naga linük atema inyakbaji teti bilemtetsü aser Naga Kuki-i tarutsü nung menungraa bilemtetsü," ta sangdong nung shia lir.

Asür kinüngtsü Mrs. Nemneihing Haokip aser lar kibong den mangyim lemsatepa, "Nü kinüngbu, tebu ka aser linük lenir ka asüba atema Kuki Tribal Union Tir aser NSCN nung ajaki tanü mangyimer kibong den külemi mangyimer. Tarutsü nung linüki nenok tepela aser tejashi mapang ajak nung nenok den alitsü ta onoki nangzükter," ta sangdong nungsa shia lir.

## ZDLSA-i legal awareness ayonga agi



**Dimapur, June 04 (TYO):** June 03, 2017 nü Town Hall, Aghunato Town nung Zunheboto District Legal Services Authority (ZDLSA)-i ayongzuka Aghunato Sub-divisional headquarters nung aliba sensotem atema legal awareness aser sensitization programme ka katsüogo.

Iba sentong nung shisalen sayurtemji- District & Sessions Judge aser Chairman ZDLSA, Niechochiy Suyie, Public Prosecutor Zunheboto, Khetoholi Yephthomi, Panel Lawyer ZDLSA, Easter H. Yephthomi aser Retainer Lawyer ZDLSA, Tovi Z. Yephtho nung liasü, aser Panel Lawyer ZDLSA, Akato Yephthomi-i

anküp o jembi.

Kasa sentong nungsa Assistant Public Prosecutor Zunheboto, Katoli Chishi leniba nung shilem agirtem den shisalemsatepba sentong kata agisema liasü.

Iba sentong nung Aghunato ADC, Phuleshe K. Yephthomi-i iba sentong omen nung ajemdaker o tatsüka jembia liasü.

Legal awareness sentong nung ya Arogo lenirtem, yimtsüyimbutem, tetsürtem, police ketdangsertem, sorkar ketdangsertem aser sensotemi shilem agia aden.

Iba sentong ya Judicial Magistrate First Class aser Secretary ZDLSA, Atoka Achumi leniba nung agia liasü.

## Manipur, Moreh jila nung rara adokba bushisüngdangtsü atema luden tentet

**Imphal, June 04 (Agencies):** Manipur state kübok Moreh jila nung rara tatalokbatem bushisüngdangtsü atema security ketdangsertem densema nisung teneti akümba luden ka tentetogo.

Home department sangdong ka ajanga, iba luden nung Army, Border Security Force (BSF), Assam Rifles, additional DGP aser IGP (Admin) nungi züngsemtem alitsü, ta metetdaksü.

Item tesem nung rara adokdaksürtem bushia anogo 15 tsüngda osang agütsütsü

atema luden dang tuyuogo.

Kasa luden-isa, arrtsülen aliba jila nung bomb amshia amakba, sepaitem amakba aser civilian ka tepsetba kulitem bushisüngdangtsü.

May 22, 2017 nü telungpurtemi aayanger tetsür ka tepsetba sülen nungi tenzuka security sepaitem aser nüburtemi Moreh jila aser Imphal-Moreh highway nung inyakba mapaten anema ola adoka inyaker.

May ita kija nunga tapoktsü apokba tatalokba pezü tashi liasü.





Agartala, June 4 :- Deobarnü Agartala lenmang nung Swachh Bharat Abhiyan sentong nung Assam Chief Minister Sarbananda Sonowal-i shilem agiba noksa nung angur.

## 'Dadagiri' tax ajanga anogo nung sen lakh 9.6 tashi saruteter

**Srirampura, June 4 (Agencies):** Assam nung BJP-i aniba sorkar kümteter küm ka dak tali aoer aser taoba hopta Ato Kilonser Narendra Modi-i state nung tebilemstütem aika azüoktetba atema ketdangsertem tenüing sang liasü.

Aji süaka osangbenertemi bushisüingdangba nung sorkari-i ozüing alema rakzük raktemba maparen samatsütsü nangzükba maparen tamakok nung lir, ta ngutetogo kechiyong state highway nung iba amala maparen agi sünga lir.

Iba den bendenloka ano tata gari anirtem aser ozüing alema sen saruba nung shilem agirtemi ashiba agi, Assam police temi parnok kümzükä ayur aser ajidang masü iba ozüing alema inyakba maparen nung tekolak nung aliba ketdangsertem dena densema lir.

Ozüing alema aser tashiyim agi sen saruba maparen ya taoba Congress sorkar mapanga liasü.

Sonowal-i aniba sorkar-i mezüingbuba telemtetba agibaji item amala maparen samatsütsü asoshi liasü, saka ita shia ozüing alema sarusajiba nung sen crore 6 shi saruteter.

Guwahati nungi Km 280 shi pilar aliba Srirampur tesem nung Assam-West Bengal arrtsü check gate nung meim camera ajanga video agiba nung nisungtemi tata gari anirtem dang tashiyim agi ozüingalema sen saruba angur. Idakji aliba nüburtemi iba dangji 'Dadagiri Tax' ta ajar aser iba maparen ya mapang talangka nung beshiba maparen ka lir, koba Sonowal-i samatsüner.

Anogoshia National Highway 31C ajang tata gari noklang aika süier aser parnok ajaki parnok süitsü asoshi alimelen saru aika agütsür. Iba highway ya northeast tesemtem linük nung tanga tesemtem den sendakteptsü asoshi tongtibangtiba lenmang lir.

"Onok arrtsü ajanga aotsü atema sen agütsüba den külemi ozüing alema saru; Dadagiri Tax dena agütsütsüsa akümer. Onok Assam-i aitba shia aser toguba shia sen agütsür. Ita isheka iba maparen anena liasü saka ano tenzükogo," ta tata gari aneshir kati ashi.

Srirampur nung 'Dadagiri tax' saruba nung tata gari shia sen 500 tashi agir. Tata gari tazüing asoshi sen 200 angir. Iba den külemi ano kuli kaket tejangja bener liaka 'sales tax' pur aser 'motor vehicle inspector' na prongla nem sen 100 kaka agütsür.

Anogoshia Srirampur ajanga tata gari 1,200 shi süier aser anogo shia ozüing alema sarusajiba nung sen lakh 9.6 saruteter.

Mananei an abenba tata garitem dang anogo nung sen 1000 meshir. Item ajak bendenteper ita ka nung ozüing alema sarusajiba nung sen crore 6 shi saruteter.

## Anentsüh agi tetsür ka aser lar chir ana anenbang

**Agartala, June 4, 2017:** Tripura nung tetsür ka aser lar chir ana dena anentsüh ajanga par ki anenbanga asüba osang Deobarnü police-i metetdaksü.

'Arishi küm 47 tain Kajal Kanya Debbarma aser la chir ana northern Tripura kübok Kamalpur tesem nung Honibar aonung anentsüh tulu ka alua par ki anenbanga süogo," ta Tripura State Rifles (TSR) third

battalion Commandant Prabir Majumder-i osangbenertem dang ashi.

Iba lendong nung Kajal Kanya kinungbo Rooti Debbarma kanga mejungi yirua mozüki nung temang anepalutsü asoshi anioka lir.

"Anentsüh kanga tulu aser tzunglu kanga sashia aruaka TSR sepai parnok 30 shi-i tasürtem aser Rooti Debbarma

taküm agiteta liasü," ta Majumder-i osangbenertem dang ashi.

tzunglu kanga sashia aruba sülen ki ya anentsüh agi anenzüka bener oa anenbang, ta osang ajanga metetdaksü.

Kasa mapang nung tanga tatalokba ka nung northern Tripura kübok Churaibari tesem nung arishi küm 19 tain lanur ka tzungi agi iseta asü.



Guwahati, June 4 :- Honibarnü Guwahati nung tesayur ka telok kati tashiyim agi raksatsüba tepsetba anema aibelena alirtem nem capital punishment agüjang, ta Assam Satra Yuba Sanmilon züingsemtemi khanga longkak aitba noksa nung angur.

## Mahila Morcha-i CM Khandu den ajurutep

**Itanagar, June 4 (Agencies):** Tanü Arunachal BJP Mahila morcha tir-i anir BJP party District ajak nungi Mahila Morcha tirtemi Chief Minister Pema Khandu'er kidang pa den ajurutepa liasü. Parnok sensaksema mapang CM Pema Khandu-i Mahila Morcha nung tirtem dang parnok ajanga state nung parnok party tangatetba aser nükjidong nüburtem nem angatetdaksütsü asoshi mepishe.

Lokti nung shilem tajung agiba atema CM-i party nung inyaker tetsürtem nem tenungsang agütsü aser nüburtem den parnok tesendaktep tajungba aliba ajanga lokti nung parnoki shilem tajungba agiteter, ta ashi.

Lokti nung mahila puri shilem tajung agiba reprangteta, Chief Minister-i ashiba agi, party aser sorkari mahila morcha purtem maparen ajak nung amshitsüla.

Pai maneni sorkar welfare scheme balala, talisa Bunkar Yojana, Swalamban Yojana, skill development, sanitation

program amala dak sendakba nung nüburtem nem tangazükba agütsütsü asoshi parnok dang mepishe.

Sorkari mapa tajung inyakbatem prokshitsü asoshi district ajak nung Mahila morcha purtem nem sorkar mapa balala amenokba metetdaksütsüla, ta CM-isa ashi.

Maneni parnok sensaksema mapang Mahila Morcha puri district tem nung tongtibang tenüingdakbatem; kaket shisatsü angazükba ren nung aser merekmejoba ren nung sentongtem anünga aliba tebilemstütem lemsatetp. Parnoki maneni BJP MLA tem dang pei constituency nung party pur sentong balala aser welfare sentongtem nung Mahila Morcha pura densemdaksütsü asoshi mepishe.

CM-i takokba tashi Mahila Morchas purtem nungita yaritsü asoshi nangzük.

Iba sensaksem nung State BJP Party tir Tapir Gao aser Organizing Secretary, Ramesh Kadaganchi na dena densema liasü.



Guwahati, June 4: World Environment Day mamong tsüingda Guwahati nung jana bendenba tesem nung tanur ana anüshi aponger jana ma nung mena aliba noksa nung angur.

## Tetsür ka samara aliba tasü mang Mizoram nung ngutet

**June 4, 2017 (Agencies):** Manipur kübok Parvachawm yimtsüing nungi Pi Lalruotmawi ya Manipur aser Mizoram na tsüingda Tuivai ayong nung aponger ao. La tasü mang ya Mizoram, Khawlien yimtsüing nungi nüburtemi ngutetogo.

Osang ajanga ashiba agi, la tasü mang ya la aponger aoba tesem nungi km 3 shi ayong lang leni lur Khawlien aser Khawdungsei yimtsüing nungi tsüingda nung ngutet. La May

29 nikongtsütsü tzülok tesashi alua aponger ao.

La tasü mang ya Khawlien nungi par sobaliba nung aliba inyakyim balala inyaker bener aotsü. "La tasü mang Parvachawm yimtsüing tanü atongtsü imlar," ta yimdaklir tambur kati ashi.

Maneni la tasü mang ngutetba ya yimtsüing anaprongla nungi nüburtemi senteper bushiba ajanga ngutet. La samara anogo pongu buba nung nguteta liasü.

## Golaghat nung süngtong benjung amongtsü

**Guwahati, June 4 (Agencies):** June 5 nü World Environment Day dak sendaka Golaghat, Melamora-i anogo ana atema süngtong benjungmong ka amongtsü ayongzükogo.

Iba benjungmong Deobar anepdang tenzükogo. Benjungmong nung wako ka atsüketa sentong lapok aser iba sülen bicycle rally ka aka. Anogo ana tsüingda iba

benjungmong nung tetoktepa balala achaayanga akatsü asoshi renema lir. Iba den külemi Golaghat tesem balala nung süngtong meyirejang pongu shi atemtsü asoshi sentong lir.

Khumtai MLA Mrinal Saikia ya Melaroma nungi lir aser iba sentong ya pai achaayanga ayongzük. Iba amala benjungmong ya Assam nung tang mezüingbuba amonger asütsü.



# TIR YIMYIM

## YIMOBILEM (EDITORIAL)

DIMAPUR MONDAY, JUNE 05, 2017

### Tajangzük agütsüba mapa inyaktsüla

Terenlok mapasa süaka karbo tajangzük magütsüba mapatema lir aser karbo tajangzük angütsüba mapatem lir. Anungji, terenlok mapa ana tsüngdaji asenoki bendangteta asen nungdak inyakra, iba jagi asenok tajangzük maneni nguyonga aotsü aser anisüngzüka alitsü. Tanü asenok pei nungdak meperitet timatema ya asenoki meinyakba agi masü mesüra government-ia terenlok mapatem asoshi sen meindokba agia masü saka asenok sentong majungba ajanga lir, kechiyong asenoki tajangzük maneni angütsüba terenlok mapa meinyaker. Tatishitsü, agi asenoki alu ayimba, chiyongtsü yanglua ayokba mesüra shiruru metsüba aser nungdak oset tapu balala yanglua yimertem anisüngzüka alitsüsa lenmang bushitepa terenlok mapa inyaktsü melen yimkong senden alidak ( panchayat/ community hall) mesüra yim süngküm yanglutsüang tongtibangba amato bilema inyaker. Ibayongji, tesem tesem nung farm aser factory tapu balala lapoka semzükba osang angashitsü melen yimsüsür aser tulerterem jaoka village gate aser community hall semzükba osangang angashir. Atangji, itemjia osang tajung saka yim süngküm aser community hall agi nübertem tebok masüngtsü aser tanurtem admission-a magütsütettsü. Tanü asenok shiranger anepalutsüa sen maka, tanurtem kaketreju balalai yoktsü mapang arudang shisabolur aser anogo shi kidang kinunger nungdak meperiteteter ta timatema mapang ya asenok ajaki shisa bentepa tajangzük angütsüba sentong kar tenzüktsü bilemdangtsübaji kanga tongtibang kumogo. Aji oda, arogoia tenla ki yanglutsü dang bilemer aser yimtenia community hall yanglutsüang bilemer ta süra nübertem tebok tazüng item kidangji adenshia rarateptsüsa akümtsü. Tanübo joko yimsüsürtem nungi tenzükter tsürabur aser tanurtem ajaki alima nem tajangzük agütsütettsüsa mapa tasen purapiteta inyaktsü bilemetsüla. Asen lima nung süngolemba, süngjanglijang aser mozü aketba süngdonglidong aser naro tapu aika lir. Item dakji aketba tagitsütemji asenoki memetetba agi asenok timatemer. Item nungdakji reprangteta asenoki item tagitsü bushitettsüba mapatem nung senotsü endoka terenlok mapa inyakra, item mapa nung jagi aruba tajangzük aser asenoki asenoksasa kangabo mebelemi tenla kia sütettsü aser community hall-a yanglutettsü. Tanü putu yabo nübertem nungdak bushitettsü merangba putu lir. Ibai nübertem tesangwa nungdakba mapang nung electric light bushiteta agütsüba, gari nungdakba mapang gari yanglutetba aser mozü nungdakba mapang mozü tapu balala yangluteta nisungtem nem taneptsü agütsüba amato asütsü. Itemji mapang mapang shia nübertem nungdak reprangteta nisung kakati inyakba mapatem lir. Kasaji tanü asen lima nung lanurtemi inyaktettsü. Teinyaktsü kaji government-i o aser mapa agi ajungshitsüla. Joko, tenlaki aser community hall tuluba aser tajungba asütsü tokteptsüba putu mapang masü saka nübertem nungdak reprangteta agütsütsü tama raktepba putu ka agi asenok tongogo. Iba ama mapang nung asenokbo tajangzük maliba mapatem nung dang temulung agütsüra, item kitem nungjia rong meteptet timatemsü aser asenok kibong aser taküm peisasa menokdaktettsü. Asen lima aser lokti nung nisung kar anisüngzüka aliba agi asen lima aser lokti animesüngzüktettsü. Asen lima aser lokti tesünep nung alitsü atema kija aser kibong shia tesünep nung alitsüla. Nisung shinga mapa teinyaktsü maka masütsüla, nisung shinga tebok tazüng memejangtsüla, nisung shinga makamaitba agi school mazüng manentsüla aser nisung shia senotsü makaba agi mozü malitet masütsüla. Iba amaji maksü timtem majurutsü atema government lir aser government-ji Kohima aser Delhi nung dang masü asen alidak tonga aruagi government amenoka lir. Asenokiang asenok den item nungdakji repranga inyaktsütsü asenok den government mali ama bilemer. Iba jagi nübertem nungdak meinyaktsüdang aser teyari agi nübertem matongdang ola madoker. Aji oda, ola adoktsüla nung madokba agi tangari asenok ya suwar amai bilemer, iba jagi mezüngmeshir ! Ibai bilemdangdi.

# OLEMSABANG

## TEMEIM KODANGA MAJENTSÜ

Mrs. Meyissongla Rtd. Deputy Director Nursing Nagaland.

Egyptian nunger apijemtsü shin o nung yamai shia lir. Temeim agi pelaa agizükbaji aonung jangratema chiyongba dang nungi tajungba. Temeim ya sempet ajak dang tuluba lir. Oshioyin aika jembitetaka temeim melira aji kecha nungdak mali. Takar aser tuler süaka temeim melira ajia amajok. Temeimi talangka aremzüker, tenük mememer, ain madoker, asü makemer, moromora masür, mesütepi mebeshir, pei ajung masar. Tangar majung mesükshir. Parnok dang aria bilemer aser temeim sayur. Lipok 43:30 nung Yosefi pei tenu Benjamin indang aria belemdang pei takdangi yir ajeb, aser pei sasa süngjemshi ta shia angur. Lipok 42:24 nunga Yosefi parnok toktsür oa ajepsü tenzük saka pai tanaben parnok dangi arua jembiba otsü angur. Kechiyong Yosefi- tedi nungertem menen atema aria bilemer aser parnok dang temeim tulu sayu. Pai parnok tai adok. Lipok 43:26 aser parnoki pa madang apudak, Yosefi pai akhidang pongmangba bilemteta arua temolung raksa. Yosefi talangka aremzüker aser parnok dang temeim sayua parnok dang junga beshi. Kechiyong temeimi mesütepi mebeshir, tangar majung masüker, ajak azüzüker. 1 kor 13. Temeim kodanga majener. Tsüngrem temoatsütem ajak pa nem moatsü. Kangasa takar, Italy nunger asangur ka pa anepdang chiyong machiyongi par kiyonger sensaker tem nem lemasa agütsü. Paji Mussoloni, tesülen pa yimsüsür ka par lima nung aküm.

America nunger Robert Lee, pa ya civil war nung commander tuler nisung ka, pa train nung aodang sensaker tantsür ka nem pa menden agüja mendaktsü, iba temeim mapa indang alimai pelaa bilema jembir. Ano, America nunger ochi meimer ka clark mapa inyaka alidang, pa medemer ochimashir kati pa ashioptsü aser dollar 300/-sentsüh atsüh, iba sentsüji küm 17 ao, tetemlok dena. Pai clark mapaji toktsür mapa tanga ka bushitsü New Orleni ao. Yangji shishidak (market) Negro nunger alartemji aika tetsüng anatsülen merangsen agi alener kanga mejungi züka merenshiba aser sen yong alartemji ayokba angu. Ibai ngua pa molungjang kanga raksa. Idangji iba indang pa molungjang telungtiba nung zülua ayu. Mapang tajung arura kenübossa ni item alartem nem nüchiso tia agütsütsü ta ashi. Pa molungjang taroktiba nung tajemzük aser tepetzük tia nung alirtem atema aria aser meima bilembaji Tsüngremi angu. Pa kodang tain aküm, küm aika election nung madoki pa timtem aika ajuru. Tesüsa election nung adoka pa 16th buba America nong president aküm. pai mezüngbuba Africa nunger alar tia nungi nüchiso agütsütsü sangdong. Iba dang ya chichiba temeim ta ajar. Africa nunger alartem nem pa nung sangdaksütsü mesüra Hon/diamond senti lung sempet imlaba masü, pai parnok odang angati nung meima bilemba agi alar tia nungi parnok nem nüchiso tiaji agütsü. "Abraham Lincon" azü agi tanak nisungtem nem nüchiso tia agütsü. Iba atema par nisungi- (America nungeri) pa kasetä sädaktsü. Iba sülen Africa nunger küm ishika tsüngda nung sports, tzüyim telong aser anüglak nung senzubar, ken tenba industry nung, aluyimba nung aser film industry ajak nung parnok nungtugu aküm. Asenoki temeimtep mapatem indang shihurutem nungia angazüktsü akok. Kenü anogo meja ka tzüküm anasa kazüa senzü, idangji mejaji ajudoker tzüyim jagi ayi, idangji mejaji yamai ayimten, "Ni tsüyim tulu nung ponger odar, kari ni yariang, tang ya ni kümzükra iba temeimji kenübossa nia meyipa yaritsü." . Idangji posü ozü kati yima orr süngo tu (leaf) ka mechizüka yok. Idangji mejaji iba süngo tu nungji ayaloker tzüsemi nungshia tzüyimküm nung nungteta toktsü. Iba amaji meja takümji kümzük. Mapang talangka lir külen, iba posü dak to akatsü asoshi nisung kati perangpong mekanger lia meja to agi yakta oa nisungba tetsüng nung metep, idangji aoksar prangpongji ali nung tsükdaktsüdang, ozüji yima oa taküm kümzük. Kenü anugo molusongzü tulu kati koya ka pua nguseta achitsü lia, koya jagi kanga mepishi. Tuler kü dang aochiang, temeim sayua ni chiokang, nia kenübo na yaritsü. Imlibilema ni chiokang ta mepishi. Molusongzüi menürema yamai koya tila kati ni ama molusongzüi patakati komala lenmang nung yaritsü ? Aji tamakoktsü ta bilem. Saka molusongzüi koyaji aochia aser meima bilema chiok. Mapang kopi melii molusongzü to meimchirtemi zütsük (net) mesanga ayuba nung pur, kanga arüa ayimten, kari dang ni yariang ni, ta ayimten. Idangji koya to agi angashia asema orr zütsük to pa tepu techira agi metepsatsü aser molusongzü to jentet. Yamaji shiruru aser meimchirtem ajak saku. Takari aser tuluri tilar aser sensaker dang temeim sayubaji amajokbo kodanga masür. Tuler aser takar aika tilar aser sensakerteri taküm kümzükba otsüren aika lir. Ibai Tsüngrem sentong lir. Iba jagi tuler aser tilar, takar, aser sensaker ajak kati ka yaritepa aser meimtepa aliba jagi Tsüngrem sentsüwangshidaktsür. Temeim mapaji alima yimya mopung nungia asenoki angazüker.

Süngdongi süngjang tapu balala küm songtema tangtsür aser asenok chidaktsür, angati dang agutsür.

Ayongi küm piyong tzü agütsür.

Ita anü petenuei tesangwa agütsür, amang sangwatsür aser lemsatsür

Ninangi ninang mojitsü agutsür.

Alii- tsünüsempongtsü ajak mongpu balala nong meya chidaktsür

Anüng nungi mepeti tsünglu yoker aser azüngtsü agütsüa asenok, shiruru, aonsotsü aser süngdonglidong yaria mesür.

Temeim mesayutetba aser ashikülak mapa ajaki sempar. Bishop Hatto ya kanga takar nisung ka liasu. Anogo shia sensakerteri pa dangi tsük alia aruba agi pa kanga lakteta aküm. Kenübo pai sensakerteri jen tulu tazüng ka nung tsük agütsütsü ta shir sensaker aika sendendaktsü, kodang sensakerteri jen sünga senten pai jeni shipanger sensaker aika mi agi rongseta sädaktsü. Pai bilem joko sensakerteri ni memeimtsü ta bilem. Saka mapang kopi melii pa dangi osang ka aru. Koyatem million aika pa achitsü arudari ta ashi. Saka pai ashi, Rhen ayong tulu ajanga orr chuba ki tuluka lir. Ni yangji jenoktsü, koyatemi ni mechitettsü. Pa yangji shipanger alidang koyatemi ayong tuluji wadanga arur chuba ki ajakji metepoker koya aikati pa tetsüng tekolak, ajak len nungi achi, pai meteta pa mang ajakji chimaba otsü lir. Temeim makaba takar dangi ataktem yamaji arur.

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agütsü mepishir**



## AMERICAN MISSIONARY JACOB THOMAS BRAHMAPUTRA

### AYONG NUNG TEPSETBA

~ Tiala Imchen, Dimapur.

Taoba hopta 26th May 2017, India nung apu talangtiba Assam aser Arunachal na tsüngda linük Dhola Sadiya nung apu lapoktsüba indang Osang kaket nung angudang, 19th Century mapang Missionary Jacob Thomas iba ayong nung rong tila (boat) ka nung mener ajangdang, süngdong ka laoa iba ayong nung tepsetba otsü bilemtet. Aser iba mapangji tanü amai apu tajungji yanglur ali ka asübo pa takümüji mesamala ta sasaseta aser nemjemseta kü mulung nung bilemyong tanü iba ocet ajanga pa taküm samaba indang den American Baptist Foreign Mission India-i aruba otsü tongmelangtiba agi lemsateper.

Linük ana tsüngda ayong km 9.15 ya akhidang 19th Century mapang anogo 124 (17weeks) indoka boat tila nung nisung teka agi anishia senzua liasü. Saka 20th Century nungibo rong nung ghonda 6 dang agia taoba ita May 25th tashi jaja. Saka tang 21st Century May 26th 2017 nungi iba ayong temdangba apu lenmang tasenba nungyabo ghonda ka dang indoka jajatsü lenmang tajung yanglutetba dangji 'Temelenshiba Putu' ta ajar. Iba apu tajung nung nüburttem melamelaa jajatsu maongka anguba atema pelar, aser iba den asen Naga nunger atema ibai tangazüksü lesson tulu keta lir ta bilema iba ocet ya zülur.

1835 Nov' ita 20th nung kibong ana Nathan Brown & O. T. Cutter Sadiya nung Mission Station mesemtsü asoshi apusoa aru. Iba mapang Assam aser Calcutta na tsüngda nung lenmang mali, Brahmaputra ayong nung boat tila nisungi dang anishia anogo 124 agia arur March ita 23, 1836 nung Sadiya atong. Iba mapang Assam-ji East India Company ket nung liasü. Aser ano iba den Burma nungeri Assam amak aser iba sülen Assam chuba yimli kanga tashi mait ajaklen lendong agi sünger liasü. Parnok Sadiya atongdang British nunger sepai tanishirtemi kanga pela agizük. Iba mapang Missionary-temi Sadiya nungi tenem kin Khamti, Singpho aser Abhor rongnung mapa inyaksü merangdang, saka iba mapang nungjibo inyaksü lenmang mesua liasü. Kechiyong tenem kin kari lenden nung aliba Assam nung yim kar maker liasü. Anungji ajaklen rara adoktsüba osang agi sünger nüburttem tetsübu nung liasü.

Iba mapang Assam nung Missionary tali nungdaksü ta angateta ABFM Board-i kibong ana Rev. & Mrs Jacob Thomas aser Rev. & Mrs Miles Bronson yok. Parnok April ita 26, 1837 nung America nungi apusoa arur Sadiya atongtsü anasa Miles Bronson ramen agi shiranga liasü. Pa yaritsu asoshi Thomas mozü abeni rong tila ka nung Sadiya bushia aru aser Sadiya atongtsü anasa tzüyim nung süngdong ka laoa pa rong nungji tepset. Sadiya nung aliba missionary-temi parnok asoshi teyarir arudar ta angashia kanga pelatepa alidang tasü mang den par telok July 17, 1837 nung Sadiya tonga aru. Aser idakji dang Jacob Thomas tasü mangji arem. Kechiyong iba putu mapang tanü amai tayimtsü mali aser America tonga aotsüji rong nung ita pungu trok agia liasü.

Missionary Thomas taküm anüolen talang nungi asen North East kintem dak tenük rangloker samaa alir kintem dang Yisu osangtajung bener arudang, pa taküm samatsüsa asen Lima tiaji kanga backward liasü. Iba mapangji tanü amai Brahmaputra ayong nungji rong tajung mali asü. Missionary-temi iba mapangji tenem kintem dangi osangtajung bener atutsü kanga merangaka senzusenbongtsü lenmang maka den tensa kanga majung liasü. Sadiya nung British Sorkar aser American Baptist Foreign Mission Station lapoker lia January 28, 1839 anepdang Khamti kin-i Sadiya amak aser British Colonel White den sepai aika tepset. Missionarytemi Sorkar alidak nungi Mile ka shi pilar liasü. Saka raraba ola angashia parnok kanga tsübua amming piyong ayong nung rong nung mener sangwadaksü. Saka Tsungremi parnok kümzüka ayu.

(Maneni taruba adok nung...)



Deobarnü Dimapur Ao Baptist Arogo kübok Yinsem Fellowship nung Kenya nungi StarKids ministry züngsemtemi sannüker Rev. Ariba Imchen, Christian Education Director Kr. R. Asenla Jamir aser C.E.M tesayurtem den külemi agiba noksa ka angur. Iba telok ya 'HelpLive International' nungi Sp. Kilang Pongen-i acha-ayanga anir aru aser parnok Green Sunday dak sendakba sentong tajung agiba ajanga tanurtem kanga temoatsü ngua liasü. Iba anogomung nungtem nung parnokisa tenlaki temeket nung süngdongtem tema yutsü. StarKids ministry nungi züngsemtemji Sharon Chepkoech, Lorna Mutegi aser Ether Kamaara nungertem lir aser parnok anogo ishika Dimapur nung school kar semdanga senzuba sülen meyipa aotsü. (Dimapur, June 4)

## ANOGO ABEN TSÜNGREM DEN

### NA SEMPARTEM DANG TAJUNG BENSHIANG

"Na sempartem dang tajung benshiang. Nenok atakatemertem dang moajang, nenok mezüngmeshirtem asoshi sarasademjang."

Luke 6: 27b- 29

Kodang na reshikangshidir, amokmerendir aser anemer ajurudir nai temoatsü agi langzükang. Yisui ashi 'Na sempartem dang tajung benshiang. Nenok atakatemertem dang moajang, nenok mezüngmeshirtem asoshi sarasademjang....' Aji shiba dang ashir, ibai Tamangertem asoshi atakteta yutsüba lir. Kechiaser aika asoshibo ibai temela masu aser jangratemtsübo masü.

Ibala mapa inyaksü asoshi tasü tait tashi tajungmesoba kanga nungdaker, Suwari meyipba rarateper, o meyiptsür aser atakatema sütsür. Saka Tsüngremibo pa chirtem dang ashir Tsükchir meimang, moajang, aser sarasademjang ta mela. Hau! iba ya inyaksü asenok asoshia kanga dang tasak lir, saka kodang asenok Tsüngrem temeim agi sünga lidir iba jagiang inyaktetsü. Kuli asüba nung ajak dangi nungi iba yimya ya tashi tulutiba lir. Nai meyipba meküpzüki temeim agi inyakba jagi Tsüngrem peladaksür aser na yamaji Pai moatsür.

Sarasadem

Yisu, Tsukchirtem dang meimtsü, moatsütsü aser sarasademtsü tashi kua. Amen

## Islamic tekong azüngtsü memulungba agi Khristan 8 khaset

**Manila, June 4 (Agencies):** civilian 19, sepai 39 aser Islamic State den sendaktepa telungpur 120 tashi tepsetogo, ta aliba kiralongrar telok kati Philippines nung Khristan ti tepset. Parnoki Islamic tamangba pusemba tekong mazüngtsü tekong merangba atema tepset ka ketdangsertemi metetdaksü.

May 23, 2017 nü IS den sendaktepa aliba Maute Group-i Marawi yimti amakdang nisung 19 tepset aser tasürtem rongnung Khristan 8 dena liasü, ta Morning Star News ajanga metetdaksü.

Marawi ya Lanao del Sur Province indang yimtiba lir aser nisung 200,000 den teimba aliba yimti nungi hopta ishika tsüngda nisung meyirjang aika jena ogo. Iba kasa telok yagi Father Teresito "Chito" Suganob dena Catholic 240 tashi pua lir.

May 23 nü Khristan ti tepsetertemji aayangertem liasü aser parnok Iligan yimti toktsür jena aodang len tom nung kiralongrartem apu, ta sorkar bushisüngdangertem local media dang ashi.

Telungpurtem jagi parnok teka süngzü agi alenba sülen Shahada züngang ta ashi aser parnok ibaji azüngtsü memulungba agi khaset. Telungpurtemi tasü mangtemji onken ka ka anasa yutsü aser "Munafik" ta tezüluba ka yutsü. "Munafik" tetezüji ashioktsür mesüra tiyazü jembir lir.

Islamic tekong azüngtsü memulungbaji Khristan tijidang masü saka telungpurtemi Police inspector Freddie Solar dena khaset, ta pa kinungtsüi ashi.

Taoba ita sorkari iba yimti mazüokteti akümba sülen

Philippines sorkari parnok tanishisang Isnilon Hapilon aputsü merangba sülen rara adok. Marawi yimti nung Maute Group-i sorkar mangyanga kiojen aika rongdoktsü aser item rongnung Catholic cathedral ka aser bishop'er ki ka dena liasü.

Philippines mitkar atema otongdar Restituto Padilla-i ashiba agi, iba yimti nung nisung 1,000 shi jena mouteti lir aser 900 shi kümzükogo.

Sepaitemi telungpur 89 tashi tepsetogo aser yimti nung shilem 90 shi atsünga agiogo, ta paisa shisem.

Maute Group-i video ka prokshiba nung, parnok pua aliba Father Suganob-i President Rodrigo Duterte dang nungi teyari meshiba aser sepaitemi iba yimti toktsür aotsü indang mepishia shia lir.

"Tir, onok iba rara tiyongtsü nung mejeber. Onoki nü dang nungi teyari meshir, telungpurtemi Lanao del Sur aser Marawi City nungi sepaitem agiendaktsünür aser tayimtsü ajanga amakba anendaktsünür" ta Father Suganob-i video nung shia lir.

Iba video ya shitak amai ajiteter saka iba ya olulu aser meshitak osang belenshitsü atema mamshitsül, ta mitkar otongdar Padilla-isa metetdaksü.

Iba video ya shitak amai ajiteter saka iba ya olulu aser meshitak osang belenshitsü atema mamshitsül, ta mitkar otongdar Padilla-isa metetdaksü.

## AMERICAN MISSIONARY JACOB THOMAS BRAHMAPUTRA

### AYONG NUNG TEPSETBA

~ Tiala Imchen, Dimapur.

Taoba hopta 26th May 2017, India nung apu talangtiba Assam aser Arunachal na tsüngda linük Dhola Sadiya nung apu lapoktsüba indang Osang kaket nung angudang, 19th Century mapang Missionary Jacob Thomas iba ayong nung rong tila (boat) ka nung mener ajangdang, süngdong ka laoa iba ayong nung tepsetba otsü bilemtet. Aser iba mapangji tanü amai apu tajungji yanglur ali ka asübo pa takümüji mesamala ta sasaseta aser nemjemseta kü mulung nung bilemyong tanü iba ocet ajanga pa taküm samaba indang den American Baptist Foreign Mission India-i aruba otsü tongmelangtiba agi lemsateper.

Linük ana tsüngda ayong km 9.15 ya akhidang 19th Century mapang anogo 124 (17weeks) indoka boat tila nung nisung teka agi anishia senzüa liasü. Saka 20th Century nungibo rong nung ghonda 6 dang agia taoba ita May 25th tashi jaja. Saka tang 21st Century May 26th 2017 nungi iba ayong temdangba apu lenmang tasenba nungyabo ghonda ka dang indoka jajatsü lenmang tajung yanglutetba dangji 'Temelenshiba Putu' ta ajar. Iba apu tajung nung nüburtem melamelaa jajatsu maongka anguba atema pelar, aser iba den asen Naga nunger atema ibai tangazüktsü lesson tulu keta lir ta bilema iba ocet ya zülur.

1835 Nov' ita 20th nung kibong ana Nathan Brown & O. T. Cutter Sadiya nung Mission Station mesemtsü asoshi apusoa aru. Iba mapang Assam aser Calcutta na tsüngda nung lenmang mali, Brahmaputra ayong nung boat tila nisungi dang anishia anogo 124 agia arur March ita 23, 1836 nung Sadiya atong. Iba mapang Assam-ji East India Company ket nung liasü. Aser ano iba den Burma nungeri Assam amak aser iba sülen Assam chuba yimli kanga tashi mait ajaklen lendong agi sünger liasü. Parnok Sadiya atongdang British nunger sepai tanishirtemi kanga pela agizük. Iba mapang Missionary-temi Sadiya nungi tenem kin Khamti, Singpho aser Abhor rongnung mapa inyaktüsü merangdang, saka iba mapang nungjibo inyaktüsü lenmang mesüa liasü. Kechiyong tenem kin kari lenden nung aliba Assam nung yim kar maker liasü. Anungji ajaklen rara adoktsüba osang agi sünger nüburtem tetsübu nung liasü.

Iba mapang Assam nung Missionary tali nungdaksü ta angateta ABFM Board-i kibong ana Rev. & Mrs Jacob Thomas aser Rev. & Mrs Miles Bronson yok. Parnok April ita 26, 1837 nung America nungi apusoa arur Sadiya atongtsü anasa Miles Bronson ramen agi shiranga liasü. Pa yaritsu asoshi Thomas mozü abeni rong tila ka nung Sadiya bushia aru aser Sadiya atongtsü anasa tzüym nung süngdong ka laoa pa rong nungji tepset. Sadiya nung aliba missionary-temi parnok asoshi teyarir arudar ta angashia kanga pelatepa alidang tasü mang den par telok July 17, 1837 nung Sadiya tonga aru. Aser idakji dang Jacob Thomas tasü mangji arem. Kechiyong iba putu mapang tanü amai tayimtsü mali aser America tonga aotsüji rong nung ita pungu trok agia liasü.

Missionary Thomas taküm anüolen talang nungi asen North East kintem dak tenük rangloker samaa alir kintem dang Yisu osangtajung bener arudang, pa taküm samatsüsa asen Lima tiaji kanga backward liasü. Iba mapangji tanü amai Brahmaputra ayong nungji rong tajung mali asü. Missionary-temi iba mapangji tenem kintem dangi osangtajung bener atutsü kanga merangaka senzüsenbongtsü lenmang maka den tensa kanga majung liasü. Sadiya nung British Sorkar aser American Baptist Foreign Mission Station lapoker lia January 28, 1839 anepdang Khamti kin-i Sadiya amak aser British Colonel White den sepai aika tepset. Missionarytemi Sorkar alidak nungi Mile ka shi pilar liasü. Saka raraba ola angashia parnok kanga tsübu ammang piyong ayong nung rong nung mener sangwadaksü. Saka Tsungremi parnok kümzüka ayu.

(Maneni taruba adok nung...)



Deobarnü Dimapur Ao Baptist Arogo kübok Yinsem Fellowship nung Kenya nungi StarKids ministry züngsemtemi sannüker Rev. Ariba Imchen, Christian Education Director Kr. R. Asenla Jamir aser C.E.M tesayurtem den külemi agiba noksa ka angur. Iba telok ya 'HelpLive International' nungi Sp. Kilang Pongen-i acha-ayanga anir aru aser parnok Green Sunday dak sendakba sentong tajung agiba ajanga tanurtem kanga temoatsü ngua liasü. Iba anogomung nungtem nung parnokisa tenlaki temeket nung süngdongtem tema yutsü. StarKids ministry nungi züngsemtemji Sharon Chepkoech, Lorna Mutegi aser Ether Kamaara nungertem lir aser parnok anogo ishika Dimapur nung school kar semdanga senzüba sülen meyipa aotsü. (Dimapur, June 4)

## ANOGO ABEN TSÜNGREM DEN

### NA SEMPARTEM DANG TAJUNG BENSHIANG

"Na sempartem dang tajung benshiang. Nenok atakatemertem dang moajang, nenok mezüngmeshirtem asoshi sarasademjang."

Luke 6: 27b- 29

Kodang na reshikangshidir, amokmerendir aser anemer ajurudir nai temoatsü agi langzükang. Yisui ashi 'Na sempartem dang tajung benshiang. Nenok atakatemertem dang moajang, nenok mezüngmeshirtem asoshi sarasademjang....' Aji shiba dang ashir, ibai Tamangertem asoshi atakteta yutsüba lir. Kechiaser aika asoshibo ibai temela masu aser jangratemtsübo masü.

Ibala mapa inyaktüsü asoshi tasü tait tashi tajungmesoba kanga nungdaker, Suwari meyipba rarateper, o meyiptsür aser atakatema sütsür. Saka Tsüngremibo pa chirtem dang ashir Tsükchir meimang, moajang, aser sarasademjang ta mela. Hau! iba ya inyaktüsü asenok asoshia kanga dang tasak lir, saka kodang asenok Tsüngrem temeim agi sünga lidir iba jagiang inyaktetsü. Kuli asüba nung ajak dangi nungi iba yimya ya tashi tulutiba lir. Nai meyipba meküpzüki temeim agi inyakba jagi Tsüngrem peladaksür aser na yamaji Pai moatsür.

Sarasadem

Yisu, Tsukchirtem dang meimtsü, moatsütsü aser sarasademtsü tashi kua. Amen

## Islamic tekong azüngtsü memulungba agi Khristan 8 khaset

**Manila, June 4 (Agencies):** civilian 19, sepai 39 aser Islamic State den sendaktepa telungpur 120 tashi tepsetogo, ta aliba kiralongrar telok kati Philippines nung Khristan ti tepset. Parnoki Islamic tamangba pusemba tekong mazüngtsü tekong merangba atema tepset ka ketdangsertemi metetdaksü.

May 23, 2017 nü IS den sendaktepa aliba Maute Group-i Marawi yimti amakdang nisung 19 tepset aser tasürtem rongnung Khristan 8 dena liasü, ta Morning Star News ajanga metetdaksü.

Marawi ya Lanao del Sur Province indang yimtiba lir aser nisung 200,000 den teimba aliba yimti nungi hopta ishika tsüngda nisung meyirjang aika jena ogo. Iba kasa telok yagi Father Teresito "Chito" Suganob dena Catholic 240 tashi pua lir.

May 23 nü Khristan ti tepsetertemji aayangertem liasü aser parnok Iligan yimti toktsür jena aodang len tom nung kiralongrartem apu, ta sorkar bushisüngdangertem local media dang ashi.

Telungpurtem jagi parnok teka süngzü agi alenba sülen Shahada züngang ta ashi aser parnok ibaji azüngtsü memulungba agi khaset. Telungpurtemi tasü mangtemji onken ka ka anasa yutsü aser "Munafik" ta tezüluba ka yutsü. "Munafik" tetezüji ashioktsür mesüra tiyazü jembir lir.

Islamic tekong azüngtsü memulungbaji Khristan tijidang masü saka telungpurtemi Police inspector Freddie Solar dena khaset, ta pa kinungtsüi ashi.

Taoba ita sorkari iba yimti mazüokteti akümba sülen

Philippines sorkari parnok tanishisang Isnilon Hapilon aputsü merangba sülen rara adok. Marawi yimti nung Maute Group-i sorkar mangyanga kiojen aika rongdoktsü aser item rongnung Catholic cathedral ka aser bishop'er ki ka dena liasü.

Philippines mitkar atema otongdar Restituto Padilla-i ashiba agi, iba yimti nung nisung 1,000 shi jena mouteti lir aser 900 shi kümzüko.

Sepaitemi telungpur 89 tashi tepsetogo aser yimti nung shilem 90 shi atsünga agiogo, ta paisa shisem.

Maute Group-i video ka prokshiba nung, parnok pua aliba Father Suganob-i President Rodrigo Duterte dang nungi teyari meshiba aser sepaitemi iba yimti toktsür aotsü indang mepishia shia lir.

"Tir, onok iba rara tiyongtsü nung mejeber. Onoki nü dang nungi teyari meshir, telungpurtemi Lanao del Sur aser Marawi City nungi sepaitem agiendaksünür aser tayimtsü ajanga amakba anendaksünür" ta Father Suganob-i video nung shia lir.

Iba video ya shitak amai ajiteter saka iba ya olulu aser meshitak osang belenshitsü atema mamshitsül, ta mitkar otongdar Padilla-isa metetdaksü.



Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



**Aries**  
21/3-19/4

Nü taküm nung temelenshi tajung kar adoktsü. Tang na lenmang shitak nung jajadagi. Senotsü kümdanga ketdangsütsüla. Nikongdang 3:30 nungi 6:30 ako mapangji na asoshi tajung asütsü.



**Taurus**  
20/4-20/5

Nai meima alibapur nem mapang agütsütsüla. Senotsü nung nü tia tajungba akümtsü. Tanübo tongtibang telemtetbatem magiba tajungba asütsü. Tanü nai mapa aika temulung süa inyaktettsü.



**Gemini**  
21/5-20/6

Tanü nai mapa ka tembanga inyaktetba ajanga na pelatsü. Nai tebilemtsü kar koktettsü. Na mapa inyakba tesem nung nai nü sempet tajungtiba nung amshitettsü. Nü tebilembatem sadoka jembitsüla.



**Cancer**  
21/6-22/7

Nai tetsükdaktsü kar ajurura tangar dang nungi teyari agitsüla. Nü tezüngjang merüktettsü asoshi tzü peria ajemtsüla. Nü temesena anepalutsüla. Chiyungtsü tali machitsüla.



**Leo**  
23/7-22/8

Nü dak shisatsü tajung alitsü aser ibaji ajanga nü tia ajungtsü. Tongteprateptsü asoshi anogo tajung ka asütsü. Senotsü nung tia junga lir. Tanep 8:30 nungi 11:00 ako mapangji na asoshi tajung asütsü.



**Virgo**  
23/8-22/9

Nü molungjang ulushitsüla iba den külemi nai aremzüka atasaba ajanga süngjang tajung tangtsütsü. Tanübo tongtibang telemtetbatem magiba tajungba asütsü.



**Libra**  
23/9-22/10

Nai jangraba mapa kar inyaktsü merangang. Kar den o lemtepa ajanga na tera jashitsüa akok. Tanü nai tongtibang mapa ka tembanga inyaktettsü. Saisapong nunga mapang intoktsüla.



**Scorpio**  
23/10-21/11

Tanü anogo ya na asoshi kanga tajung asütsü. Senotsü nung tia junga lir. Tanü nai maparen tasen ka tenzüksüa akok. Tarutsü asoshi sentong yanglutsü anogo tajung ka asütsü.



**Sagittarius**  
22/11-21/12

Tanü nai mapa ajak takok ngua inyaktettsü. Nai nü dak mulung lemtettsü. Senotsü dak sentakba mapatem junga shisadangerang inyaktsüla. Nikongdang 5:00 nungi 7:00 ako mapangji na asoshi tajung asütsü.



**Capricorn**  
22/12-19/1

Nüngdak makaba nung o matsüteptsüla. Khen nung mapa aika meinyaktsüla. Nikongdang ner medemer kari na yarisemba ajanga na kanga ajangzüksü.



**Aquarius**  
20/1-18/2

Nü tebilemtsütem bentettsü asoshi anogo tajung ka asütsü. Senotsü nung nü tia kanga junga lir. Nai maongka tasen ka angutsü. Iba lenmang tasenba nungji nai junga shisadanger mera agitsüla.



**Pisces**  
19/2-20/3

Nü mulungjang nung tasüngdangbatemji arendaka melii asüngdangtsüla. Telemtetba ajak junga shisadangerang agitsüla. Tongteprateptsü asoshi anogo tajung ka asütsü.

# Ariana Grande-i UK nung la sapurtem semdang



Royal Manchester Children's Hospital semdanga yangji la sapurtem ajuruogo, ta osang ka ajanga ashi.

Taoba ita la kenten sentong nung bomb lendong atalokdang Adam Harrison aser Lauren Thorpe nata yirua liasü, aser tenati lar jala arishi küm 8, Lily o Grande na indang noksa lemsatep.

Ariana-ia la indang Instagram nung noksa ka lemsatep.

Thorpe-i, "Onoki Ariana dang pelar. Taonung Ariana Grande-i inyakba mapaji tesüngmangtsüka. Lily kanga pelaa liasü," ta ashi.

Taoba ita lendong nung takoksa angurtem nem teyari agütsütsü atema ayongba kenten sentong nung Grande-i Justin Bieber, Katy Perry, Coldplay, Pharrell, Usher, Miley Cyrus aser Niall Horan nunger densema lar medemer kentener aika ayongsema shilem agiogo.

**Los Angeles, June 04, 2017:** Nüngtugu kentener, Ariana Grande-i maneni kenten sentong akatsü atema UK-i arua liasü aser Deobar aonung lai Manchester nung aliba Old Trafford stadium nung shilem agiogo. May 22, 2017 aonung UK

yimti, Manchester nung la kenten sentong ka nung kiralongrartemi amakdang tanur aika densema nisung 22 asüba aser iba nüngtem nung iba kenten sentong ayonga agi. Hokolbar aonung arishi küm 23 kentener, Ariana-i UK nung

# '3 Storeys' film August 25 nü sayatsü

**Mumbai, June 4 (Agencies):** 3 Storeys film nung shilem agirtem ajak August 25 nü iba film sayatsü asoshi kanga jangraa yongyaa atatar. Iba film nung ya otsü balala asem meketa yanglua lir.

Arjun Mukherjee atema director ka ama iba film nung mezüngbuba shilem agir asütsü. Iba film nung pa Ritesh Sidhwani aser Farhan Akhtar indang Excel Media and Entertainment aser B4U den külemi longjemer inyaker.

"Excel Media kübok mezüngbuba film lir. Film title ajanga ajak ashir '3 Storeys' 25/08/17," ta Sidhwani-i tweet asü.

'3 Storeys' film nung Sharman Joshi, Pulkit Samrat, Richa Chadda aser Renuka



Shahane nungeri tongti shilem agir.

"Otsü karbo lemsateptsü dalang. '3 Storeys' film August 25 nü sayatsü," ta Pulkit-i tweet asü.

Iba film nung Renuka Shahane tereprangtsü

khenyongi balaka lir, aser paia Twitter ajanga iba film nung shilem agi jangratemba aser sayatsü matetba lemsatepa liasü.

Iba film ya Aisha Ahmed aser Ankit Rathi na atema mezüngbuba film asütsü.



Mumbai nung Bollywood actor Sanjay Dutt den pa kinungtsü Maanyata aser tanurtemi tebu Sunil Dutt asüba bilemteta süngdong ka atemba noksa nung angur.

## TAN HOPTA ATEMA - KOMA SÜLA ?

Q Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Olong 20 shi nung June 09, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobar nü adoktsütsü.



## Anand Mahindra-i EV India nung yanglutsü asoshi Tesla CEO Elon Musk jaok

**June 4, 2017 (Agencies):** Anand Mahindra-i India nung electric garitem yanglutsü asoshi Elon Musk jaokogo. India nung 2030 tashi nungbo electric gari dang amshitsüba nükjidong aliba ajanga Tesla CEO Elon Musk tali metetnüa jangradaktsüogo.

Iba sentong dak sendakba nung Musk-i yamai tweed asü, "India-i 2030 tashi nungbo electric gari dang ayoktsü bendanga agütsüogo. Solar power shishilembaba nung iba ya market tulutiba lir." Iba tweed ngua Anand Mahindra-i timbaji tajungba lir ta langzüa pa dang India nung EV yanglutsü atema Mahindra den longjemer inyaktüsü asoshi jaok.

India nung Mahindra company kijai dang electric garitem ayoker. Parnoki e20, e20 Plus aser e-Verito amala

garitem ayoker. Kasa mapang nung alima ajunga nung electric gari aika yanglua ayoker rongnung Tesla company ya dang lir. Parnoki yangluba garitem rongnung Tesla Model X aser Model S densema lir.


Mahindra aser OLA na longjemer Nagpur nung e-mobility atema e2Os gari 100 amenokogo. Tesla company pur taruba ita tem nung 'Model 3 sedan' gari sayatsü asoshi renema lir aser India sorkar 'Make In India' kübok India nung 'Model 3' ayoktsü asoshi tejangraba sayuogo. Iba dak sendakba nung India sorkaria Twitter ajanga Musk nem maparen inyaka aotsü nung menoba rasa zülutsü.

Twitter ajanga nisung kati India nung gari ayoktsü asoshi Musk dang pa sentong indang

asündangba nung pai policy balala ajanga India nung amenoktsü asoshi tetsükdangtsü lir ta langzüba sülen iba ya atalok.

M a k e - I n - I n d i a ketdangsertemi policy balala dak sendakba nung menoba atema telangzüba yamai agütsü. CEOs tem Mahindra aser Musk nungeri electric gari shishilembaba nung India alima nem metetdaksütsü asoshi meranga inyakba ya kanga dang temaitsü tajung lir. Maneni Anand Mahindra-i India nung EV project atema Musk dang pa den longjemer inyaktüsü asoshi asündangba ya kanga tenüing asangtsü tetemsü. Tesla company yakta India nung amenoka India ya electric gari shishilembaba tesem tajung ka kümdaktsütsü imlar.

## 2017 May ita tashi nung Royal Enfield ayokba shilem 25 agi timba kümogo



**June 4, 2017 (Agencies):** Royal Enfield company-i parnok motorcycle ayokba kanga renloka odar. 2017 May ita tashi nung India nung aser bendanglen ayokba ajak senteper parnok motorcycle 60696 yokogo. Iba ajanga dang nungi shilem 25 agi tali akümba jangaogo.

Royal Enfield-i Classic 350, Thunderbird, Continental GT aser Himalayan model tem yanglua ayoker. Yaküm may ita tashi nung parnok motorcycle 47232 ayok, koba 2017 may ita tashi nungbo India nung parnok motorcycle 58647 yokogo.

Royal Enfield motorcycle ayokba tem rongnung Himalayan 400cc aser Classic 350 na timtiba ayoker. Tawa 700 cc Continental GT tasenba ayoktsü sangdongba ajanga shishilembaba nung Harley Davidson aser Triumph company tem dak terabo kongshitsü, koba tang tashi nung


India nunger company kechaia inyakteta mali.

Maneni Royal Enfield-i tawa 'non extreme ride format' nung tejangrartem atem 'Scramble' mezüingbuba edition akatsüba sangdongogo. Iba sentong ya June 14 nungi 18 tashi Himachal Pradesh, Shimla nung akatsü.

2017 May ita Eicher Motors-i shishilembaba atsülangtsü asoshi 2018-17 FY nung Royal Enfield yangludak Chennai anasa Vallam Vadagal amenoktsü atema aser UK aser India nung 'technical centre' ana amenoktsü asoshi sen crore 800 indoktsüba sangdongogo. Iba sentong ya 2017 August ita tashi nungbo mapa küma inyaktüsü imlar.

Plant tasenba nung motorcycle tem yanglu tenzüka sülen nungi plant asemprongla meyokteper 2017 aser 2018 tsüingda nung Royal Enfield motorcycle 825,000 yanglutsü imlar.

## ISRO-i seret 3,136 taret satellite ka anünglaki yoktsü



**New Delhi, June 04 (Agencies):** India-i rocket taretba, Geosynchronous Satellite Launching Vehicle Mark-III (GSLV Mk-III) amshia communication satellite GSAT-19 Hombarnü anünglaki yoktsü, aser iba satellite tozük ya Boeing Jumbo Jet pongu sünga khu inoker aliba mesüra shiti tain 200 den saku asütsü.

Indian Space Research

Organisation (ISRO) ajanga ashiba agi iba geosynchronous satellite ya Hombar nikongdang 5:28 ako nung anünglaki yoktsü.

Taoba mapang ISRO mendenbuba, K Kasturirangan, shiba tasa ajanga GSLV Mk-III ya yanglu, pai ashiba agi iba rocket nung ya India nungertem anünglaki anir tutettsü.

GSLV Mark-III ya geostationary orbit-i satellite yoktsü aser India nunger anünglaki anir atuba tayimtsütem yokdaksütsü yanglu. Tang aliba GSLV dang nungi iba rocket nung ya India indang 'cryogenic third stage' aser khu tali bener atutsü akoker.

Iba GSAT-19 satellite kisüing ya seret 3,136 lir aser ibaji shiti ka anünglaki anir atur amai asütsü.

Ton asem dak tali tozük aliba GSAT-19 satellite ya India nung yangluba satellite rongnung taretba asütsü. Iba satellite nung ya technology tasen aika tendanger.

Iba communication satellite

ajanga Indian nunger asoshi temelenshi balaka bener arutsütsü, ta GSAT-19 yangluba tesem, Space Applications Centre, Ahmedabad nung director, Tapan Misra-i ashi.

Iba satellite nung tashi ya India nung yangluba Lithium-ions battery tem ajanga agütsütsü. Iba battery ya amshia electric gari aser bus nunga tashi agütsütettsü.

"GSAT-19 ajanga Geostationary Radiation Spectrometer (GRASP) bener atutsü aser iba ajanga 'charged particles', 'space radiation' aser iba indang 'electronic components' tem indang bushisüingdangtsü," ta ISRO-i ashi.

Iba GSAT-19 satellite nung ya 'miniaturised heat pipe', 'fibre optic gyro' aser Micro-Electro-Mechanical System (MEMS) accelerometer' amala advance spacecraft technology tasen inoka lir, ta ISRO-i ashir.

GSAT-19 satellite nung ya signal agizüka telangzübatem meyiba agütsüba (transponders) mali.

## 2017, May nung Honda two wheelers lakh 5 dak tali ayok

**June 04, 2017 (Agencies):** 2017-18 fiscal m a p a n g shishilembaba nung terenlok aliba sayuba maparen kaji H o n d a Motorcycle &



Scooter India Pvt. Ltd ya ka lir aser iba company indang tetsüing ana aketba gari ita ana adonga kanga junga ayoker.

2017, May ita kisüing nunga iba company indang tetsüing ana aketba gari 537,035 yokogo. Taoba küm kasa ita nung iba company indang tetsüing ana aketba gari 436,328 yoka liasü. Honda indang gari ayokba nung shilem 23 renloka lir.

2017, May ita India nung Honda indang automatic scooter 334,165 ayok aser 2016 küm May ita India nung kasa company indang scooter ya 268,49 yoka liasü.

Linük nung motorcycle ayokba rongnung Honda ya jenjang tanabuba nung lir. Honda indang motorcycle ya 2016, May ita nung 147,431 yoka liasü aser 2017, May nung

176,216 ayok. Honda 2Wheelers India indang garitem tanga linüki belena aoba nung shilem 30 agi timba kümoko aser taoba küm May ita nung 20,468 bener aoba taküm kasa ita nung 26,654 bener ao.

"Linük nung 2017, April-May tsüingda tetsüing ana aketba talongtsütem indang industry ainba nung Honda ya temaba jenjang nung lir.

Nüburtemi Honda indang talongtsütem sabuba ajanga iba company ita ana tashi jenjang ana buba nung lir. Saka GST mapa küma aoba sülen temelenshi karbo angutsü südi," ta Honda Motorcycle & Scooter India Pvt. Ltd indang Sales & Marketing nung Senior Vice President, Yadvinder Singh Guleria-i ashi.



Singapore, June 4 :- June 4 nü Prince Harry Singapore nung tanurtem aliba ki ka semdangba mapang Muslim Youth Ambassador of Peace Nazhath Faheema den Muslim nunger lumia amongba ita anü lur chiyongba nung shilem agiba noksa nung angur.





New Delhi, June 04, 2017: 'World Environment Day' atongtsü anogo ka jilia Deobarnü New Delhi nung iba dak sendakba sentong ka nung Science & Technology, Earth Sciences and Environment, Forest & Climate Change Union Minister, Dr. Harsh Vardhan, Ministry of Environment, Forest & Climate Change Secy., Ajay Narayan Jha aser tangartemi tenangzükba agiba noksa nung angur.

## Army nung tetsürtem nem raraba shilem agütsütsü: Rawat

**New Delhi, June 04 (Agencies):** Indian Army nung temelenshi ka adoka tetsürtem nema raraba shilem agidaktsütsü atema inyakdar. Tang alima nung linük ishikati dang sepai nung tetsürtem nem raraba shilem agütsür.

Indian Army Chief, Gen Bipin Rawat-i, army nung teburtemi dang raraba shilem agir, ajisüaka tetsürtem nema raraba shilem agütsütsü atema maparen kanga keraa inyakdar, aser tamasabo tetsürtemji military police nung shimtsü, ta metetdaktsü.

"Tetsürtem army nung shimoktsü atema ni kobi melii tenzüktsü. Tamasabo onoki

tetsürtemji military police jawans ama shimtsü," ta paisa metetdaktsü.

Tang tetsürtem ya Army nung medical, legal, educational, signals aser engineering wings ama nung dang shimoka inyakdaktsü, saka onük kar nung ajemdaker parnok nem raraba shilembo magütsür.

Army tongti, Rawat-i, tetsürtem army nung shimtsü atema tebilemba lir aser iba atemaji sorkar den jembidar, ta metetdaktsü.

"Onoki iba maparenji tenzükogo," ta pai osangbenertem dang ashi.

Tang alima nung Germany, Australia, Canada, US, Britain,

Denmark, Finland, France, Norway, Sweden aser Israel linüktemi dang tetsürtem nem raraba shilem agütsü lir.

Yaküm Indian Air Force nung otsü tasen ka yanglua IAF-i tetsür asem fighter pilots shima liasü.

Tang IAF indang fighter squadron nung züngsema aliba tetsür asemji- Avani Chaturvedi, Bhawana Kanth aser Mohana Singh nung lir.

Ano külen Indian Navy-isa Navy rongtem nung tetsürtem anioktsü atema tang tejembidak lir.

Tang Indian Navy-i tetsürtem legal, logistics, naval architecture aser engineering departments nung anioka inyakdaktsüdar.

## India-i Paris Agreement atema inyaktsü: Dr. Vardhan

**New Delhi/Agartala, June 04 (Agencies):** United States Tir, Donald Trump-i Paris climate tezüngzüktep nungi pilaba dak sendakba nung tanü India Environment Union Minister, Dr. Harsh Vardhan-i, alima kümzüka ayutsü onüktem India-i khuret bena inyaktsü, ta metetdaktsü.

Osangbenertem senden ka nung jembidang Vardhan-i, "India-i alima kümzüka ayutsü onüktem atema inyaktsü, alima tzü-mopung menenba anema raratsü, biodiversity, arem, ayong aser ajak kümzüka ayutsü atema inyaktsü. Onoki inyakyim

shidak benoka tiptema inyaker aser onoki iba atema teti inyaktsü. Onoki shinga dang nungia certificate menüngdaker," ta ashi.

"Kari onok nungitaka mesüra menungitaka onoki alima tsüngsang-mopung melenshiba atema inyaktsü. Germany aser tanga linüktem nunga Ato kilonser (Narendra Modi)-i, onoki iba onük atema inyaktsü, aser iba tangatetba nungi masetshitsü ta shiogo. Onoki alima tsüngsang-mopung melenshiba atema inyaktsü, aser iba nungji teratatsü kecha mali," ta paisa ashi.

Vardhan-i anogo asemnü Tripura state semdanga liasü, aser iba mapang nung BJP lenirtem den jembidang pai, taruba state assembly election nung tang sorkar anema nürburtemi vote agütsütsü aser BJP-i taruba sorkar akümtsü, ta metetdaktsü.

"Tripura state nürburtemi state nung küm 20 dak tali sorkar tashi nung aliba party, CPM anema inyaktsü, anungji taruba election nung BJP-i takok angutsü," ta pai ashi.

Sangküm küm tetenzüklen Tripura nung state assembly election agütsü.

## Manmohan-i GDP ajema akumtsü ta takzüba shitak atalokogo: Jaipal

**Hyderabad, June 04 (Agencies):** Taoba Ato kilonser, Manmohan Singh-i, demonetisation ajanga GDP ainba rate ajema akumtsü ta takzüba shitak atalokogo, ta Honibarnü Congress lenir tain, S Jaipal Reddy-i ashi.

Hyderabad nung Press Club of Hyderabad-i ayongzükba 'Meet the Press' sentong nung jembidang Jaipal-i ashiba agi, "Pai (Manmohan Singh) Parliament nung minute 6 dang jembia liasü, aser iba mapang nung pai, National production rate shilem 1 mesüra 2 ajema akumtsü ta metetdaktsü liasü."

"Kodang asenoki India tesem ajak indang asadandir, shilem ka (GDP) tetezü, linük nung sen lakh crore 1.50 jenjang production ajema akumba lir. Yakünü sorkari sangdongba osang nung National production rate shilem ka ajema akumba metetdaktsüogo," ta Congress lenirisa ashi.

Yaküm Narendra Modi-i aniba Centre sorkari benokba demonetization ajanga India indang GDP ainba shilem 6.1 tashi ajema alua alima nung rongsenkettsüng jenjang tekaratiba ainba jenjang makai küma China linüki ajatetogo.

Yakünü Central Statistics

Office (CSO) osang ka ajanga metetdaktsüba agi, 2016-17 küm tatensabuba ita pezü nung India'er Gross Value Added (GVA) shilem 5.6 tashi ajema aluogo.

"Ato kilonser, Narendra Modi-i demonetisation ya asüngsashiba ka lir ta jembia aser ibaji ajanga nürburtem anogo 50 shi dang tim-atemtsü ta jembia, ajisüaka ibaji ajanga nisung crore aika yimtittem nungi peipei yimdaki aotsüsa aküm. Iba den külemi aluyimertemi alu nung aonsotsütema metsünütet," ta Reddy-isa ashi.

Modi-isa India nungeri bendanglen ochimashi sen rizünga aliba sen lakh crore 80 meyipa bener arutsü ta nangzük. Saka tawa BJP-i aniba NDA sorkari Supreme Court dang, International teloktemi black money alirtem osang nokdang ta metetdaktsü, ta Congress lenirisa ashi.

Reddy-i, Modi nem vote agütsürtemi kechiba US Tir, Donald Trump aitsür? ta asüngdang.

"Modi nem vote agütsürtem dang ni ya asüngdang- Nenoki social media nung pa (Modi) pusemer. Ajisüaka kechiba nenoki Trump bo aitsür? Trump ji shiba? Paji America nunger Modi lir," ta Reddy-isa ashi.



Patna (Bihar), June 04, 2017: Deobarnü Bihar yimtiba, Patna nung Municipal Election indang polling station ka nung vote agütsüba sülen tetsürtemi pei temeyong nung vote agütsüba temaitsü sayuba noksa nung angur.

## Kashmir ji India tashi, saka Centre-i tashimait kümdaktsür: Rahul Gandhi

**New Delhi, June 04 (Agencies):** Deobarnü Congress tatong Tir, Rahul Gandhi-i, tang Kashmir nung tensa mesüngjemteti aliba ya Centre sorkar tai ajanga lir, ta aitsü.

State nung BJP-PDP teloktepji tashimait, ta shia Rahul-i, Centre sorkari, Kashmir nung tesünap bener arutsütsü ta yazü nangzük, aser parnoki Kashmir onük atema tim mesüi inyaker, ta aitsü.

Osangbener den jembidang Rahul-i, "Ita 6-7 tejaklen Arun Jaitley (Union Finance Minister)-i ni ajurua liasü. Ni pa dang 'nenoki Kashmir onük atema junga meinyaker aser yangji nenoki lendong adokdaktsütsü' ta ashi. Ajisüaka

Arun Jaitley-i kü o meyipja, Kashmir nung tesünap lir ta ashi. India sorkar aser Ato kilonser nati Kashmir onük atema tim mesüi inyaker," ta ashi.

"Parnoki (BJP) tim mesüi inyakba aser yimtenren nung tajangzük angutsü atema Kashmir amshiba ajanga linük nung timtem adokdaktsür," ta Congress lenirisa ashi.

Tang Jammu & Kashmir nung BJP-PDP teloktep nung tensa majungba atema party kati ka aitsütepdar, ta osang angazük.

"Kashmir ji India'er tashi lir, saka parnoki (sorkar) ibaji ajanga India tashimait kümdaktsür," ta Rahul Gandhi-i shisem.



Srinagar, June 04, 2017: Deobarnü BB Cantontment, Srinagar nung Army temi külem sepai Gunner (Operator), Manivannan G aser Naik Dipak Kumar na nem akhüm agütsüba noksa nung angur.



Mosul, June 4: Iraq mitkartemi Islamic States telungpurtem den raraba mapang western Mosul nungi mokozü adokba noksa nung angur.

### Iraq sorkar busemertemi IS tesepek ka agitetogo

**Mosul, June 04 (Agencies):** Syria arrtsülen Mosul nung Islamic State (IS) kiralongrar temi amokbanga aliba tongtibang tesem ka Iraq sorkar busema rarar temi Deobarnü agitetogo, ta mitkar osang ajanga ashi.

Popular Mobilization Force (PMF) temi Mosul nungi kilometre 130 orr aliba al-Baaj district nung IS kiralongrar aliba tesepek tanaben

agitetogo, ta PMF indang lenir, Abu Mahdi al-Muhandis-i osangbener dang ashi.

PMF aser Iraq nüburtemi al-Baaj agitetba asoshi benjungtepogo aser Syria den arrtsü nungi kiralongrartem aridokba ya takok tulu lir, ta al-Muhandis-isa shisem.

Muslim nunger asoshi temeshi ita, Ramadan nung süaka tanen maka raraba asoshi

al-Muhandis-i par telok dang pelaba ashi aser iba raraba mapang nisung taküm aika samaogo aser rongsena yamaji laluogo, ta shisem.

Saka iba rara nung par telok nungi mesüra kiralongrar asüba tejangja bo Abu Mahdi-i mashi.

West Mosul nung PMF temi IS den raraba mapang mitkar aser police temi yimti tiyong nung raraba mapang lir.

### Kiralongrar anema raratsü asoshi Pakistan sorkari tetsür 46 shimtet

**Karachi, June 04 (Agencies):** Pakistan meyong Sindh sorkari kiralongrar den raratsü aser osangtsüsang bendentsü asoshi police indang counter-terror department nung tetsür 40 dak tali shimtetba ajanga iba province nung otsü tasen ka yangluogo, ta osang ajanga ashi.

Tetendangba balala agir shimba tetsürtem ya Pakistan Army ajanga training agütsüsü, ta ashi.

Tetsürtem ya police constable ama shim aser ita trok tashi training agiba sülen police nung anioxtsü.

Jila aser yimtsüng nungi tetsür 46 den tebur 1,461 shimtet, ta Counter-Terrorism

Department (CTD) aser Rapid Response Force indang tatidang osang nung metetdakja lir.

Tetsürtem temeden kümzüka ayutsü asoshi yimden yimsüsür temi temzüng aser ozüng aika yanglua liaka police nung tetsür ya shilem ana dang tajemba lir, ta osang ajanga ashir.

National Police Bureau (NPB) nung shia aliba agi, linük nung police 391,364 aliba nungi tetsür züngsem 5,731 dang lir.

Ketdangsertemi sobaliba aser tetsü-tebu yimya amshiba aser sorkar nung ketdangsertemi majungshiba ajanga police nung tetsür shilem kanga ajema lir, ta osang ajangasa ashi.



Pasay, June 4 : Manila, Philippines nung aliba Resort World Casino nung Hokulbar aonung lendong agütsüsang, Philippine nunger arishi küm 42 tain, Jessie Javier Carlos noksa osangbener dang Manila police tekolakba, Oscar Albayalde-i Pasay city hotel nung sayuba mapang tangokba noksa nung angur.

### Ireland Ato Kelonser asütsü India-origin, Leo Varadkar shim

**Dublin, June 04 (Agencies):** Hokulbarnü Ireland nung Ato Kelonser atema election agiba nung Fine Gael telok nungi Leo Varadkar-i takok angu.

Arishi küm 38 tain, Varadkar ya Ireland indang Ato Kelonser tanubutisang asütsü aser pai vote shilem 60 angu aser pa den tokteper Simon Coveney-i vote shilem 40 angu.

Iba menden asoshi Varadkar shimba ajanga Ireland nung akhi mapang nungi amshia aruba yimsü melenshiogo, kechiyong pa tebu ya India nunger doctor ka lir.

Party züngsem, local representative aser parliament züngsem temi vote agütsüba nung Varadkar-i takok nguaka popular vote bo Coveney-i

timba ngutet.

June 12 nung Ireland indang parliament sentepba mapang pa indang nomination ya agizüxtsü.

Varadkar-i Enda Kenny melentsü. Kenny ya iba telok nung küm 15 tashi tekolak süa aru.

Party indang electoral college system nung parliamentary party züngsem indang vote shilem 65, councillor indang vote shilem 10 aser ordinary züngsem indang vote shilem 25 lir.

Parliamentary party züngsem 73 nungi züngsem 51-i Varadkar nem vote agütsü.

Leo Varadkar ya tebur o tebur kasa shi nung medemer (gay) lir aser oa dak iba yimya aliba ya Ireland nung nübur

ajungai meteta lir.

Varadkar ya 1979, January 18 nung aso. Pa tebu ya Mumbai nungi doctor ka lir aser tetsü ya Ireland tsür nurse ka lir.

Varadkar aser teyi ana ya Dublin nung soa intet aser Trinity College, Dublin nung medicine azüng.

Varadkar ya doctor ka lir saka pa arishi küm 30 majungdang councillor aküm aser pa parliament nung 2007 küm elect asüba sülen yimden yimsüsüba nung bendanga agüja inyak.

Varadkar ya tang Ireland parliament nung Social Protection minister menden bena lir aser pai cabinet menden aika nung inyaktang lir.

### North Korea-i maneni raradang amshiba oset yanglutsü: KCNA

**Seoul, June 04 (Agencies):** North Korea-i raradang amshitsü nok-nü yangluba anentsü asoshi United Nations (UN)-i ozüng tesashi agütsüba ya khenyongi magizüker aser iba maparen maneni inyaktü, ta North Korea sorkar meyong news agency, Korean Central News Agency (KCNA)-i Deobarnü ashi.

North Korea-i maneni missile tendangba ajanga United States aser Pyongyang tembar tajung, China-ia molunga iba raraba oset meyanglutsü asoshi UN Security Council ajanga Hokulbarnü tenokdangba agütsü.

UN-i tenokdangba agütsüba nung ya tsükchir temi ashioktsüba mapa lir aser iba ajanga Democratic People's Republic of Korea (DPRK) indang nuclear tashi ya tashiyim agi anendaktsüsü aser iba ajanga rongsenkettsüng nung tesama aludaktsüsü, ta North Korea indang foreign ministry odongtar-i ashiba osang ka KCNA ajanga sangdong.

"Tenokdangba ji kechi koma arudir aruaka asenoki aser

linük tashi aser linük ka aliba temeden kümzüka ayutsü asoshi nuclear tashi tuluba küma yanglutsü aser takok mangu tashi maneni inyaktü," ta odongtar-i ashi.

North Korea-i 2006 küm mezüngbuba nuclear tendangba mapang nungi tanü tashi UN Security Council ajanga tenokdangba agütsübatem kata mangai arudagi aser linük ka kümzüka ayutsü indang temeden raksatsür, ta North Korea-i ashir.

North Korea-i nuclear aser missile yangluba sentontem anendaktsüsü asoshi United States-i kanga merangaka takok monguteti lir aser United State atongtsüsa nuclear aliba missile yanglutsü Pyongyang-i nangzüka lir.

Pyongyang-i nuclear aser missile yangluba anendaktsüsü asoshi Trump administration ajanga China dang kanga ajungshir.

UN Security Council ajanga North Korea nem tenokdangba agütsüba ya US aser China-nati molungba nung inyakba lir, ta North Korea-i aitsür.



Hong Kong, June 4 : China nung pro-democracy movement anendaktsü küm 28buba nüngtem nung 'candlelight vigil' ka agitsü sentepba mapang longkak aiter kati yimyim ayimba mapang tangokba mapang agiba noksa nung angur. Tesülen banner nung "Communist party sama-ang" ta zülua aliba noksa nung angur.



## Kiralongrartemi..

(TAPAK 1 NUNGI)

"Kiralongraba ajanga kiralongraba rashia odaktsür aser iba ya tanü alima atema lendong tulu ka lir. Kiralongrartemi ajizüktepa ozüing alema mapa inyaker aser taochi kecha melii inyaksangshir. Asenoki iba anema inyaksüla" ta laisa metetdaksü.

Taküm March ita London nung Parliament amakba sülen UK nung security aser intelligence services ajanga kiralongratsü tasa pungu tashi nokdangtetogo, ta May-isa shisem.

British Prime Minister-i UK indang counter-terror ozüing meyipa reprangshitsü ta ashi aser temelenshi asübatem rongnung, Islamist tangatetba madak takok angutsüba atema counter-terror operation inyaksü, kiralongratsü tasa atongtsü atema online nung kiralongrartem nem maangka magütsütsü, linük nung kiralongrar anema inyaksü aser police nem tashi talila agütsüsemtsü lir, ta laisa shisem.

Iba lendong atalokba sülen yimten teloktei general election atema nüboyimba sentongtem magii thinenogo.

Tan agi tanabenbuba UK nung yimtenren teloktemi nüboyimba sentong anener asütsü. May 22 nü Manchester amakba sülen-a parnoki anogo asemnü atema nüboyimba sentongtem ajak anena liasü.

## Nashi metepsettsü..

(TAPAK 1 NUNGI)

Yimtenren telok balalai tebilembatem lemsatepba meyipa reprangshir asü masü, sorkari iba onük atema tanga tebilemba ali asü mali ta osangbenertemi asüingdangba langzüdang Minister Vardhan-i iba osang ashi.

Nashi metepsettsü atema ozüing tasen yangluba ajanga linük ajungalen nisungtemi ashishiteper aser Kerala o West Bengal sorkartemi Centre indang tetuyuba anema kanga tekong meranga nokdaker.

"Iba tenokdangba ya democratic inyakyim aser linük temzüng anema lir. Ozü sorkari iba tenokdangba magizütsü" ta West Bengal Chief Minister Mamata Banerjee-i shiogo.

Tamil Nadu nunga Madras High Court-i iba tetuyuba ya hopta pezü atema thiena atatsü telemtetba agiogo. Tenokdangba tasen agütsüba anema okadak ken o ka benokba sülen parnoki iba telemtetba agi.

Madras High Court nung benokba ken o nung, iba tenokdangba ya kiji inyaknuba inyaksü nüjiso, pei tepok atema ayangtsü temeten aser state sorkar indang tashi alema inyakba lir, ta shia lir.

Ajisüaka, tanü Minister Vardhan-i ashiba agi, "Prevention of Cruelty to Animals Act kübok yangluba teinyaksütemji chiyungtsü achiba yimya mesüra shiruru tepseta ayokba maparen anema masü" ta ashi.

Tamil Nadu kübok Madurai, Coimbatore, Erode aser Hosur tesemtem nung iba tenokdangba anema lungkak aitba sentongtem ayongzuka agiogo.

Madurai nungbo Tamil nunger telok kati nashishi achiba tetoktepba ka ayongzuka agiba atema police-i züingsem kar apu.

IIT-Madras nunga kaketshir telok kati May 28, 2017 nü campus nung 'beef- fest' ka ayongzuka amung.

OFFICE OF THE  
WATSÜ MUNG DANG

HEADQUARTERS : MOKOKCHUNG - 798601: NAGALAND  
REGD: EDS/GSS/70/84-85 DATED 08-04-1986

## PELABA LEMSATEPER

Nagaland Telongtet nung Imkongliba Memorial District Hospital (IMDH) Mokokchung-i Kayakalp Award 2016-17 tematiba jenjang ajangzükba atema Watsü Mungdangi pelaba lemsateper. Nenok mapa tajung asoshi tenüngsang agütsür. Ano maneni tajungtiba nung nübur tenzüksü imlaa atar.

Sd/-  
Wt. Moanaro  
Tongti Zülur  
Watsü Mungdang

Sd/-  
Wt. Maongienla  
Tir  
Watsü Mungdang

OFFICE OF THE  
DIMAPUR NOKPU SENSO TELONGJEM  
DIMAPUR - 797112 : NAGALAND

## TEPELA LEMSATEPER

Ao Senden 2017 nungi Ao kin len anitsü ketdangpurtem tasen shimba rongnung ozü senso tajung, Wb. Chubawati Longchar, Vice President menden nung shimba asoshi tenüngsang agütsüba den külemi pelaba lemsateper.

Parnok lenisüba nung Ao kin dang masü saka Naga kin ajunga lenisütsü asoshi Tsüngremi pa aser ketdangpurtem ajunga taküm mapang aser sempet maneni mojangma.

(IMOTAMJEN LONGCHAR)  
President  
DNST

(IMTINIKEN IMCHEN)  
Gen - Secretary  
DNST.

## KHUKHUA AITSÜR

Chuchuyimpang nunger Asür Sujongkaba'er jabaso Wb. Lolenwati-i pa kinungtsü Wt. Moarenla, Chungtia June 01, 2017 aonung meimchiri mebilemba mapa tamajung inyaka rishikangshia züker külen tepsetba ya kanga dang tim masüba mapa tamajung inyakogo ta Rionsanger Putu Tatar Menden Chuchuyimpang-i khukhua aitsür ta sangdonger.

Wb. Lolenwati-i pa kinungtsü Wt. Moarenla Chungtia tepsetbaji meimchir-i hau ta magizüktetba mapa tamajung inyak asünung pa (Lolenwati) nem tapet temerenshi agütsütsü talang ta yimteni ayimoktsür. Iba den külemi asür kibong den Rionsanger Putu Tatar Menden Chuchuyimpang-ia asükhu mangyim jashi lemsateper ta sangdonger.

Sd/-  
I Zulu Imsong,  
Chairman

Sd/-  
Meritemüsü,  
Secretary Village Council

OFFICE OF THE  
WATSÜ MUNG DANG

HEADQUARTERS : MOKOKCHUNG - 798601: NAGALAND  
REGD: EDS/GSS/70/84-85 DATED 08-04-1986

## AITSÜR

Chungtiatsür asür Wt. Moarenla pei kinungbo Wb. Lolenwati Chuchuyimpang 2 June 2017 anogo meimchir dak taochi mekai rishikangshia tepsetba osang angashia Watsü Mungdangi kanga aoksar aser süngmanger.

Iba dak sendakba maparen nung Mokokchung Police Personnel ajanga mapang shidak nung aibelener pua aruba atema tenüngsang agütsür.

Shibai meimchir yimya nung maliba mapa inyakogo tapet temerenshi agütsütsüla, aser shiri tasa balala ajanga tepuokdak nungi anizüksü merangdir Watsü Mungdangi tai madoktsü.

Maneni asür kinunger den mangyim lemsateper aser sasaa bilemer. Tsüngremi asür kinunger ajunga tesünep nung yujang ta Watsü Mungdang sarasadem.

Sd/-  
Wt. Moanaro  
Tongti Zülur  
Watsü Mungdang

Sd/-  
Wt. Maongienla  
Tir  
Watsü Mungdang

NATIONAL INSTITUTE OF ELECTRONICS  
& INFORMATION TECHNOLOGY  
EXTENSION CENTRE, CHUCHUYIMLANG, NAGALANDADMISSION OPEN  
COMPUTER DIPLOMA COURSESO  
LEVEL

## Course Description

CAREER OPTIONS  
• EDP Assistant  
• Junior Programmer  
• Web Designer/Lab  
• Technical Asst.

## Eligibility

- 1 Year Diploma Course
- 2 semesters of 6 Months each
- 2 Modules in each semester
- Course consists of subjects concerning with Microsoft Office, Web Design, Programming language (C) , Hardware and Networking, Project, etc.
- 10+2 passed or ITI Certificate

A  
LEVEL

## Course Description

CAREER OPTIONS  
• Programmer  
• Web Administrator  
• Web Content Developer  
• Technical assistant

## Eligibility

- 1 1/2 Years Diploma Course Semester System
- Course consists of subjects concerning computer software, office automation products, business system module using database packages, programming languages, computer architecture, data-structure, database management system, operating system, Networking, etc.
- O-Level Passed or Graduate

## OFFER

TUITION & MONTHLY FEE IS FREE FOR ST/SC students.  
Required documents during admission: Admit card and Marksheet of last qualifying exam, Passport size photo, 3 Nos & ST/SC certificate

## Admission

LAST DATE OF ADMISSION IS 20<sup>th</sup> JUNE 2017

Contact: 03692241357/ 9856071050/ 9612808377  
Site : www.nielit.gov.in/chuchuyimlang

Mail : chuchuyimlang@nielit.gov.in  
Follow : www.facebook.com/nielit.chuchu

## Real Madrid-i Champions League kokogo



**Cardiff, June 4 (Agencies):** Honibarnü Cardiff nung Champions League final asaya nung Real Madrid-i 4-1 agi Juventus madak takok nguogo. Iba asaya nung Cristiano Ronaldo-i goal ana tashi agüja liasü.

Asaya tenzüker mezüngbuba goal Ronaldo-i agütsü saka mapang tatsüka tsüngda nung Mario Mandzukic goal kanga dang tajung ka agüja küpzük. Iba sülen asaya tanabuba shilem nung Casemiro, Ronaldo aser Marco Asensio nungeri goal kaka agüja Madrid puri takok

angu. Iba takok ya parnok asoshi küm 4buba nung tasembububa takok lir aser ajak senteper 12 buba takok lir.

Ronaldo Champions League takoker rongnung tang agi bezübenbuba adener aser taküm züngsema küm 5 tashi iba asayamong nung goal timtiba agütsür rongnung mezüngbuba jenjang ajangetogo. Iba takok ajanga ano maneni pa Ballons d'Or 5 ben buba angutsü asoshi maongka lapoktsür, koba tang tashi nung Lionel Messi-i ajangeta lir.

Zinedine Zidane Real

Madrid coach mapa agizüker tang agi ita 17 buba dang lir saka pai aniba teloki European Cup anaben tashi atonga kokogo. Tang tashi nung Arrigo Sacchi-i aniba AC Milan team-i dang European championship anaben tashi atonga koka lir. Parnoki 1989 aser 1990 küm koka liasü.

Iba season nung Madrid-i La Liga aser European Cup na prongla kokogo aser iba takok ya 1958 küm sülenbo taküm mezüngbuba lir. Parnoki ano Club World Cup aser European Super Cup dena koka lir.

## Thailand Open Grand Prix B. Sai Praneeth-i kokogo



**Bangkok, June 4 (Agencies):** Deobarnü Thailand Open Grand Prix badminton championships nung India nunger asayar B. Sai Praneeth-i takok nguogo.

Praneeth-i final asaya nung Indonesia nunger Jonatan Christie 17-21, 21-18, 21-19 agi akok.

Iba asaya ya ghonda kaser minute 11 agia asaya. Asaya nung Praneeth-i mezüngbuba set makok aser iba sülen tanabuba aser tasembuba set koka pai iba asaya akok. Iba takok ya pa asoshi 2017 nung tanabuba takok asütsü.

Semi final asaya nung pai Thailand nunger asayar Pannawit Thongnuam 21-11, 21-15 agi ayong ayonga koka liasü.

Pa ya India nunger rongnungi Super Series title akoker pezübuba dang lir aser

pai iba jenjang Singapore Super Series akokdang ajangeta liasü. Syed Modi International Grand Prix final asaya nung pa Sameer Verma-i tsükdaktsü.

Taoba ita Singapore Open asayamong nung pai külem India nunger asayar Kidambi Srikanth koka pa asoshi mezüngbuba Super Series title nguteta liasü. Pai 17-21, 21-17, 21-12 agi Srikanth madak takok angu.

Kasa mapang nung PM Narendra Modi-i B Sai Praneeth nem Thailand Open akokba atema tenüngsang agütsü.

"Thailand Open badminton tournament akokba atema B Sai Praneeth nem tenüngsang agütsür. Nü takok ajanga India nunger ajak pelar aser nema danga bilemer: PM @narendramodi," ta PM official handle-i tweed asü.

## Nadal aser Wozniacki quarterfinal nung lir



Rafael Nadal



Kristina Mladenovic



Jelena Ostapenko

### French Open 2017

**Paris, June 04 (Agencies):** French Open tokuben tashi koka alisang, Spain nunger tennis asayar Rafael Nadal iba tournament quarter-final tongogo aser tetsür kija asayaba nung Carolina Wozniacki-ia 2009 French Open champion, Svetlana Kuznetsova madak takok ngua tetsürtem quarter tongtetogo.

Roland Garros nung Nadal-i pa indang asayaba sempet tajung sayua kasa lisopur, Roberto Bautista Agut madak 6-1, 6-2, 6-2 agi takok ngua Roger Federer-i French Open quarter-final tiben tongtetba otsü den saku kümogo.

"Ni pelar, kechiyong Roberto ya asayar tajung ka lir. Quarter-final nung ano khen asayatsü maongka anguba ya kanga tongtibang lir," ta Honibarnü arishi küm 31 ajungsang, Nadal-i ashi.

Taoba küm French Open koka alisang, Novak Djokovic-

a Deobar aonung Spain nunger Albert Ramos-Vinolas madak takok ngura kasa asayamong nung quarter-i 11ben buba atur asütsü.

Japan nunger Kei Nishikori-a South Korea nunger Hyeon Chung den set pongu tashi asayar last 16 tongtetogo.

World No. 8, Nishikori aser Chung na tsüngda asayaba nung Nishikori-i World No. 67, Chung madak 7-5, 6-4, 6-7 (4/7), 0-6 aser 6-4 agi akok.

Roland Garros tasembuba round nung Asia nungi asayar ana ajurutepba ya ibai mezüngbuba lir aser 2014 US Open final asayasang, Nishikori-i quarter-final nung Fernando Verdasco den asayatsü.

Russia nunger Karen Khachanov aser Andy Murray-na pezübuba round asayatsü lir. Karen-i America nunger John Isner madak 7-6 (7/1), 6-3, 6-7 (5/7), 7-6 (7/3) agi koka liasü.

2017 French Open tetsürtem tennis kija asaya nung Wozniacki mezüngbuba

quarter-final tongtetogo. Lai Kuznetsova madak 6-1, 4-6, 6-2 agi takok angu.

Wozniacki ya quarter-final nung Australia tsür Samantha Stosur mesüra Latvia tsür Jelena Ostapenko den asayatsü.

Kasa asayamong nung Karolina Pliskova-i Germany tsür Carina Witthoef madak 7-5, 6-1 agi kokteta round pezübuba tongtetogo.

Pliskova-i quarter-final nung Paraguay tsür Veronica Capede Royg den asayatsü.

World No. 290, Petra Martic-i Latvia tsür Anastasija Sevastova madak 6-1, 6-1 agi koka last 16 tongtetogo.

Tanga asaya ka nung taoba küm tetsürtem French Open marok bena alila, Muguruza-a tsükogo. Spain tsür, Garbine Muguruza ya Kristina Mladenovic-i 6-1, 3-6, aser 6-3 agi tsükdaktsü.

Arishi küm 24 tain, Mladenovic ya last eight nung Venus Williams mesüra Timea Bacsinszky den asayatsü.


## World Table Tennis C'ships Ding Ning-i kokogo

**Dusseldorf, June 4 (Agencies):** Deobarnü World No. 1 Ding Ning-i külem China nunger asayar third seed Zhu Yuling 4-2 agi koka World Table Tennis Championships tetsürtem kicha asaya asembuba kokogo.

Ding ya Rio Olympic champion lir aser pai mezüngbuba game 11-4 agi akok saka Zhu shiba tang mezüngbuba world championships final asayar lai game ana 11-9, 11-4 agi atonga koka 2-1 agi la tejakdang liasü.

Asayar anapronglai kanga junga asayatet saka Ding shibai 2011 aser 2015 nung world title koka ali lai 9-10 ta aliba game point ka save asü. Iba sülen lai point asem tashi atonga ngua score 2-2 aküm.

Zhu-i tang tashi nung 2015 China Open final nung dang Ding koka lir. Lai pezübuba game nung aibelen aika asü saka kasa mapang nung arishi küm 27 tain Ding-i kanga kümdanga asayaa 11-6 agi akok. Iba sülen tatembangbuba asaya 11-7 agi koka Ding-i iba title akok.



"World title asemben tashi koktetba ya kanga dang jangtratetsüka lir. Iba takok ya Chinese national team külemi longjemer inyakba ajanga lir," ta lai ashi.

Ding ano la teammate Liu Shiwen den külemi tarep semifinal asayatsüba lir.

"Ni asüng tetsür tarep asaya nung junga asayatetsü imlar aser iba sülen anisüngzüktsü," ta tarutsü indang asüngdang dang lai langzü.

China tsür asayar rongnungi world title asemben tashi akoker rongnung Ding tasembuba lir. Iba title ya Deng Yaping aser Wang Nan nati koka lir.

**BILEMDANGANG**  
"Nü teka nung aliba agi tenük süngna na ji chichiba takar lir".